

## **ASO LUA, 23 IUNI 2015**

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**FOFOGA FETALAI:** I le agaga faaaloalo ou te faatalofa atu ai i le paia ma le mamalu maualuga o le tatou Maota Fono i lenei taeao, ia e talitonu le faamoemoe e le faaitiitia le agaga o le ofo alofa atu ma faatalofa atu i le tulaga aloaia, ona o lea ua tau mai lelei le saofaiga i lenei taeao, e manatu foi ua atoa pou o lauga i le paia ma le mamalu o le tatou Maota i ona tulaga faalupelupe, o paia masani aua le afio o le tatou Palemene i ona paia popo ma ona pa e le solo, lau Afioga i le Taitai o le Malo ma lau Kapeneta, lau Afioga i le Taitai o le Itu Agai ma sui usufono mamalu uma o le tatou Maota Fono i lenei taeao.

O le agaga faaaloalo ou te ofo alofa atu ma faatalofa atu, malo le onosai, malo foi le taupeau mai, o lea ua tatou taunuu mai foi i lenei aso faaopopo o le tatou galuega e pei ona faatulagaina, ia e le toe na ma se laina o lo o faagasolo le tatou Tala ootoo o le Tupe, e leai se isi mataupu e sili ona taua i Taualumaga a le Fono Aoao Faitulafono, a oo loa ina tapa mea tau tupe mo le tamaoaiga ma le faasoasoina o le faagaioiina o le tatou atunuu, ia ona ou tapa lea o le onosai i le tatou Maota Fono. O lea foi ua faasolo ina uumi a tatou taimi fono, ma le faamoemoe e tatou te galulue faatasi i le faatauaina o tatou taimi. O lea o le a faagasolo le tatou galuega o lenei aso, ae momoli atu le faafetai i le paia ma le mamalu o lo tatou Maota o e ua maea ona tulei saunoa, ia o lo o tapuaia pea lo tatou atunuu, ia Samoa, e momoli atu pea le agaga faafetai ona o le tapuaiga. O lenei foi taeao fou ia viia le Atua ua alafai mai i faguga lelei le paia ma le mamalu o le atunuu, ia alo ia i o outou faiva a manaia, ia tui mai le mulipapaga ma feula pea le mulila a o feagai lou Palemene i feau ma tiute o felafolafoaiga i lenei aso, ia auaiitia mea uma i Lona alofa ma Lona agalelei. E faia le tatou malologa ananafi ua faaiuiu mai le saunoaga a le Afioga i le sui usufono mo Falelatai ma Samatau, le sui usufono mo Falelatai ma Samatau, ia o le a avatu pea le avanoa e faaiuiu mai le saunoaga, ona sauni mai lea o se isi sui usufono mo lana saunoaga aua le tatou Tala o le Tupe. Tulai mai le sui usufono mamalu.

### **TULAFONO TAU FAAOFI O LE FAATATAUINA O TUPE FAAOPOPO (NU. 2) 2014/2015 & TULAFONO TAU FAAOFI O LE FAATATAUINA O TUPE 2015/2016 – felafolafoaiga faaauau i luga o le faitauga faalua – Aso 3**

**Afioga TAEFU LEMI (Falelatai ma Samatau):** Malo faafetai i lau Afioga i le Fofoga Fetalai, ia tatou aeaie ia lea manu ua ulu, ua aulia manuia lenei taeao fou.

E auai lenei itumalo i le talosaga molia ma faafetaia ma sulaina le viiga ma le faafetai i le Atua ua maua lo outou soifua laulelei ma le lagi e mama i lenei taeao fou i le faafofogaaga a Samoa aemaise o le tapuaiga manuia i lenei taeao.

Lau Afioga i le Fofoga Fetalai e faaiuiu le tatou Fono i le aso ananafi, e leai ua faaiuiu atu se manatu. Sa ou agai i le Matagaluega o le Soifua Maloloina ma ou tatalo faatauana i le Afioga i le Minisita, ia alofagia se falemai, ou te le iloa pe a faasamoa le upu falemai, e tasi lava le faasamoa, ae o sina tamai mea lava lea e manao atu i ai lenei itumalo, tau lava o se mea, ua maliliu tagata o lou itumalo mai Falelatai e le oo i Faleolo, e le oo i Leulumoega, e faamanatu pea suafa o i latou e iloga, ua uma ona ou avea le lisi lea i le Afioga i le Minisita i le mamao, e moomia se masini e faamanava ai le okesene. Ia alofagia e lau Afioga i le Minisita. Ua ou maua saunoaga a nisi o sui usufono, ua i ai falemai ae toe o se fale e nonofo ai teine fomai, toe lava o se fale e nofo ai le alii fomai, toe lava o se nofoa i i ma se nofoa i o, toe lava o se masini faamama toto, lau Afioga i le Minisita, ou te le manao i se mea o na mea, na o sina mea lava e toomaga i ai le itumalo, sina fualaa, faamanava le tamaitiiti o le a mole le manava, o le agaga lea. O le falemai o lenei itumalo lau Afioga i le Fofoga Fetalai, na tulai mai lava le tatou Vaega Faaupufai, o la lava e i ai. Le tatou Vaega Faaupufai e Puipuia Aia Tatau a Tagatanuu o le itumalo. Ia o le tatalo lea, e taumafai mai lo matou itumalo aemaise lava se Sui Palemia le suli o lenei itumalo, ae uma ane, ua leai se falemai. E faaluafesasi foi le tofa a le itumalo ma le taumafai mai a matou, po o le la itu po o lenei itu. Lau Afioga i le Minisita, o lau tatalo lena i lau Afioga, ia alofagia lenei itumalo o sui ma feoi o le atunuu, o tagatanuu o Samoa, o tagata e masani i le tala, 'o le mea e lelei i Apia, e lelei i Savaii,' ou te tatalo atu, e faapena foi le manatu o lenei itumalo, 'o le mea e lelei i Savaii, e lelei foi i Falelatai ma Samatau.'

O le agaga lea lau Afioga i le Fofoga Fetalai, a o le agaga o le tatou Tala o le Tupe, ia tatou faasoosoa tatau ma tatou fuafua lelei, o le agaga lena o le Tala o le Tupe lea e aumai nei, if we have to leave within our means, e taua le faasoosoa tatau, e taua le fuafua lelei, aemaise o le tatou tatalo e fai soo pea, 'ia e foai mai ia te i matou mea e ai e tatau ma le aso,' ae uma loa le laina lena lau Afioga i le Fofoga Fetalai o le tatalo a le Alii ona faapea lea, 'ia e faamagalo mai ia te i matou i a matou agasala.' Lau Afioga i le Fofoga Fetalai, i le agaga lena, ou te faamalulu atu ai i le Maota, o le a se sala i le taumafai atu a lenei itumalo ma le faafofogaaga a Samoa, ia malu ave i fale, ina ne i o matou naunau tele i le ia, ia ae le manumanu i le upega. Ou te faamalulu atu lava i le faafofoaga, e faamalulu i alii ma tamaitai fomai, o lou naunau ia lelei la outou auunaga e ala ai ona ou fautua atu faapena, aua e faatinoina a tatou asiasiga, tolu, fa, lima fomai e tie up i le taeao atoa e fai le asiasiga, a o lea ou te talanoa atu e silasila pea i le faatinoga i na practice po o atoatoa lona lelei.

Aua o le agaga lava ia e le faapea o le a fai ona....na tatou fananau mai lava o fai, a o le agaga ia lelei ona faatino, ia sefe ma lelei ona faatino. O lea ua tatou maua o lea e i ai lipoti e tatau ona fai ae le o faia, ia pe le o le taimi lelei lena e fai ai nai ia lipoti -ma o lau tuualalo lena i lau Afioga, ia outou alolofa alii ma tamaitai fomai, ou te faamalulu atu, e le o i ai lava se isi o lo o i ai se atoatoa, a maua loa le gasegase e le mafai e tatou ona togafiti, ia fai le lipoti ma tauaao atu ia i latou e tatau ona tauaao i ai.

Lau Afioga i le Fofoga Fetalai, faafetai, ia manuia tele lau Afioga ma le Palemene, manuia le faafofogaaga a Samoa mai Ao seia oo i ona Iu, manuia lou itumalo i le tapuai mai, Falelatai ma Samatau, ia manuia le Fono.

**FOFOGA FETALAI:** Malo saunoa i le sui usufono mo Falelatai ma Samatau, o ala na o mea e faifai malie ma ave malu le tofa, o lea foi ua faafofoga Afioga i Minisita, ia togi pa tau i le ave le faaoioi a le itumalo aua le tatou faatinoina o galuega.

Ia le sui usufono mo Alataua Sisifo e matau atu o lea ua mumu mai lou moli, tulai mai le sui usufono mo Alataua Sisifo.

**Afioga LAFATELE PATRICK LEIATAUALESA (Alataua Sisifo);** Lau Afioga i le Fofoga Fetalai ou te tulai atu ma le agaga faaaloalo, e folasia foi se lagona o lenei itumalo e tusa ai ma le Tala Autu o le Tupe pei ona lauiliuina i le tatou Maota i lenei taeao.

Ae le i agai sa matou faamatalaga i le faasoaga o le tamaoaiga o Samoa, e ao ona matou faatalofa atu i le paia o le Maota i lau Afioga i le Fofoga Fetalai faapea foi le ee mai o le Afioga i le Taitai o le Malo ma lana Kapeneta, lau Afioga i le Taitai o le Itu Agai faapea sui usufono mamalu o lupe na faia mai i le fuifui aua le Maota o Samoa.

E faatalofa atu foi i le tapuaiga a le atunuu, e amata mai lava i Lana Afioga Mamalu, O Le Ao o le Malo seia paia a tatou fanauiti. O Faauluuluga o Matagaluega eseese o le tatou Malo o lo o vae ma lima i ai lo tatou Malo, e faatalofa atu i lenei taeao fou. Le paia o le Aufaigaluega Totofi a le Atua o lo o faafalelemalu i so o se tafa o lenei atunuu, malo le galulue aua le feagai ai ma le Galuega a lo tatou Matai.

E le mafai foi ona faagaloina o tatou uso i Sasae le afio o lau Afioga i le Kovana Sili ma lau Kapeneta, faapea foi le Peresetene o le Senate ma le Maota Maua, le afio o lau Afioga i le Fofoga Fetalai ma le Maota o Sui, faapea le tapuaiga a Tutuila ma Manua. Ona faapea lea o sa matou tala i lenei taeao fou, ia i se taimi seu i fanua lo matou sa ma oo atu sa matou tala aua le tapuaiga a lo tatou itumalo pele, le Alataua Sisifo e faamuli i ai sa matou tala, ae se i fai so tatou sao i le faasoaga o le tamaoaiga o Samoa aua foi le Tala Faatatau o le Tupe i lenei taeao.

Lau Afioga i le Fofoga Fetalai ma le mamalu o le Maota, o le matou sao i lenei taeao e avatu faafautuaga sa matou tuualalo foi i nisi o mea e fia faaleleia i lenei itumalo, e le tele ni nai atinae.

Sa maitau lava ma le totoa i le taimi ua sola ma le fatia ua alu i le aso ananafi, ia le tele o sui usufono sa taumafai atu foi ona o le tele o latou atinae, ona ou manatua ai lava lea o lenei itumalo, ua matou nofonofa ma ou tilotilo i lou ulufale mai i le Maota o le atunuu, e fitu lelei tausaga o matou onosai foi ma matou faatalitali, o le taimi atoa lava lenei faatoa maua ai le matou vai - ma e talitonu foi le taofi ma le faamoemoe i le taeao lenei, e le faigofie le tau faasoasoaina, e le faigofie le tau fetuunaiina o itumalo e 49, a o le matou tala i lenei taeao, ia tatou onosai, o lenei ua ou talatala faavaatiu vaega ia, e fitu lelei tausaga o lau Paeaiga faatoa maua le suavai taumafai a lenei itumalo - ma ou te talitonu foi e le faigofie le tau faasoasoaina o vaega ia ma ia mafai ona laugatasia uma itumalo taitasi i atinae a lo tatou Malo.

Lau Afioga i le Fofoga Fetalai, e le tele nisi o Minisita e fia oo i ai sa matou tala faafautuaga o le matou tuualalo, o le matou faleaoga lea i Falelima, lau

Afioga i le Minisita mo Aoga, Taaloga ma Aganuu, na ona avatu lava i ou autafa e taoto ai, po o fea e aga i ai le tofa ma le faautautaga, o lena ua faataoto atu e te alofagia, o lenei faleaoga ua fai sina pala, pe le i tai maua lava se fund po o se vaegatupe e tau.....

**FOFOGA FETALAI:** Malie le sui usufono, o lea o le a tulai atu le Minisita mo Aoga, Taaloga ma Aganuu, tulai mai lau Afioga i le Minisita.

**Afioga Hon Magele Mauiliu (Minisita mo Aoga, Taaloga ma Aganuu):** Faafetai i le sui usufono mamalu. E pei foi ona faamatala atu i le taimi ua alu, o mea nei o faleaoga o mea e patino i nuu ma alalafaga. Ae e i ai foi le taimi e fesoasoani atu ai le Malo i lea tulaga e pei foi ona i ai ia tatou faalapotopotoga mai fafo, na aumai e le Malo e fai ai talosaga a nuu ma afioaga mo fesoasoani. O lea la ou te matauina ua uma ona fai le talosaga a Falelima. Ona taatia atu lea i le Faalapotopotoga lea na ave ai o le Faalapotopotoga a Iapani, o latou e faasoa mai, a o le lisi lea na ou vaai i ai o la e latalata lava i luga ia Falelima. O lona uiga e le o toe umi se taimi. Ou te matau foi masalo ua atoa le 30 talosaga la e nofonofo ma le vaega lena, a o le tala fiafia lea ou te tau atu, o la lava e maualuga ia Falelima, ona faasolo mai ai lea i isi talosaga. A o le mea lena e patino lava ia te outou o le komiti, ae avatu le lagolago a le Matagaluega e fesoasoani e faatonutonu ma lagolago a outou talosaga, o lena sa fai ou tiute o lena e faafofoga mai le itumalo o lena na e alu fai le talosaga, ia o la ua i le JICA, ia e le toe umi se taimi, faafetai le onosai.

**Afioga Hon Palusalua Faapo II:** Lau Afioga i le Fofoga Fetalai o se mea e fia faasao i le saunoaga a le sui usufono.

**FOFOGA FETALAI:** O le sui usufono po o le Minisita?

**Afioga Hon Palusalua Faapo II:** O le sui usufono?

**FOFOGA FETALAI:** Ia agai i le sui usufono.

**Afioga Hon Palusalua Faapo II:** E matau manino lava i lau faalogo, e fitu tausaga o faatali le vai a le itumalo, lau Afioga ua tele Paeaiga o taumafai lenei sui usufono sa i inei i le Maota lenei, o lea e alaala mai Aliimalemanu le Afioga i le Minisita mo Fesootaiga ma Faamatalaga Tekonolosi, e tasi lea tagata finau mo le vai o Alataua Sisifo, e le na o le fitu la tausaga, ua leva, ua leva ona tauanau e nai sui usufono le vai, le vai o Alataua Sisifo, ae faafetai ua laki ia, ua fetau le nofo i le nofoa ma le fai o le vai.

**FOFOGA FETALAI:** O lea ua maua, o lea ua maua lau taufaaosooso i lenei taeao.

Malie le Afioga i le sui usufono mamalu, se i tuu atu le avanoa i le Afioga i le Palemia.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui:** Lau Afioga i le Fofoga Fetalai, e eseese lava mea, e i ai afioaga o la e tafe ai le vai, ae i ai afioaga e leai se vai, ia ona o loa lea o tatou i

inisinia e sue le vai i lalo i le eleele. Ia e i ai le taimi e eli, eli, eli, eli, e leai se vai, ua toetiiti o o i lalo i le fia selau maila e leai se vai. Ia ona toe o foi lea e saili. O le mea lea e tupu, a timu, ona tafe lea o le vai i lalo o le eleele e i ai la vaega o eleele e i ai Ana, ona alu atu lea o le vai faaputu ai i ina. O le ala foi lena a maua le vai e pamu ae e manino. Ia a alu atu lava la le eli ua sao, ua sao. A alu atu foi e le mafai e le maua, ua le maua, ae ua fia masina o eli, a o le tau foi o tatou masini e le taugofie. O le ala lena o lea na o ai le SLC faatau mai foi le latou masini. O lea foi sa faitioina ai ona o le taumafai e eli ona e le faatalia ia vai o isi i le masini la e tasi e i Savaii. E eseese mea. Aemaise lava le itu atu lea o tatou i Savaii lea e aumai ai talosaga. E leai ni vaitafe o tafe ai. Ae oo mai foi la i le taimi lenei, o lea ua amata ona pepe vai i ogaeleele sa masani ona maua ai le vai ona o le mea lea o le tata i lalo o laau. O le ala foi lena o lea e malosi ai le polokalame a le tatou Siosiomaga e taofiofi le ta o laau.

Lau Afioga i le Fofoga Fetalai o le tele o galuega e fai i le vili i lalo o le eleele, afai lava e alu atu tau i le papa, ua le aoga atoa lena masina. O le vai lea e i o i Falealupo, na umi o eli ma tau sue ai se mea e maua ai le vai. Ana le elia i tafatafa i le mea la e fai ai le faatoaga a le sui usufono mo Falealupo, e le maua le vai. Ua tatau foi la i le sui usufono mo Falealupo ona alu ese ma le eleele o lo o maua ai le vai. E i ai foi la ma le vai lea e i i le faatoaga a le Westec i Faleolo o lea e maua mai ai le tatou vai, o le laki o i ina o le tele o le ogaeleele lea e faaputu mai ai le suavai.

Lau Afioga i le Fofoga Fetalai, e ala ona tau faamatala atu mea ia, ona e le faigofie mea ia. E i ai ia vaega ia o le atunuu e mago e leai ni vaitafe o i ai, ae oo lava foi i isi vaega o Samoa e i ai vaitafe, o le mea lena ua amata ona aliali mai e oo loa ina umi mugala, ona pepe foi lea o vai. Ona o le mea lea o le ta le faautauta o laau e taofi ai le suavai mai le tafe mai loa lava ma alu sao i le sami. Ia o le fesoasoani atu lena.

**FOFOGA FETALAI:** Faafetai. Leaga o lea sa taua le.....

Tulai mai le sui usufono mamalu mo Falealupo.

**Afioga Hon Aeau Peniamina Leavaiseeta (Falealupo):** I, e sao. Se i faamalalama lava sina.....E sao le saunoaga a le Afioga i le Palemia i le vai lea a matou i Falealupo, a silasila i ai i le matou vai lea, ua uma ona test e tasi lava, e ala ona ou tulai leaga e faia mai i i, ua outou malamalama foi o tatou sa.....o le plateau e tasi lava aua e sosoo lava matou, o le mea la e faamaonia ai lau tala, e le i suea o, e talitonu lelei lava le au eli vai aua e muamua matou o le malosi ia, sa i ai le Afioga i le Palemia i le tatalaina o le vai a Falealupo, e le mamao la ma i pe tasi le maila e va ai ma matou, o le plateau lava lea e tasi, o le mea lena na ona eli lava o o maua loa o le matua manaia o vai, a, a o la e sao, o le tuai lava, o le tuai ona fai vai o si toeaina lea, o fua ia o le available o le resources.....

**FOFOGA FETALAI:** O lea ua maua.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui:** Lau Afioga i le Fofoga Fetalai, sa inaina ai le sui usufono i le tuai, a o la e eli lava. E ala ona fai atu le tala lea, o la e eli lava, ae le faapea o ni masini foi lea e na o le tutui atu lava alu loa i lalo le vai. E tele aso o tau eli

le papa i lalo, ae leai lava ma se vai o maua. E tele mea faapena e tutupu, o le eli, eli, eli, eli, e uma ifo e leai se vai, o le mea lena e ala ai ona tuai a tatou mea. A o le mea e aupito sili ona taua, o lea e amanaia talosaga.

**FOFOGA FETALAI:** Malo saunoa i lau Afioga i le Palemia.  
Ia tulai mai le sui usufono mo Alataua Sisifo.

**Afioga LAFATELE PATRICK LEIATAUALES:** Lau Afioga i le Fofoga Fetalai, e leai lava se leaga o sa matou tala sa fai atu, e ala ona fai atu le matou tala e fitu tausaga o matou faatalitali, ona o le agaga e le tele uma ni a tatou tupe.

E 49 itumalo, o le agaga moni lena e ala ai ona tau momoli atu, ona sa maitau lava ma le totoa i le taimi ua sola ma fatia ua alu, talofa i nai isi sui usufono e tagitagi lava i le taimi lenei.

Lau Afioga i le Fofoga Fetalai o le a fai atu lau tala lea, o le tamai taimi laitiiti lava lea e totoa nei o le Faiga Palota, e le toe talitonu se nuu, e fai se atinae pe le faia se atinae, e le toe talitonu lava se nuu ia oe, a o le matou tala lea e fai atu o lea lava e mama - ma ou te fautuaina le Taitai o le Itu Agai, e le o se laki le mea lea ua ou laki ai, o lea ua ou fai atu le tala lea ia oe, aua e te faalotoleaga fua le ma va ma Aliimalemanu, o lea ou te malamalama lelei, o le taimi a o Minisita le Tofa Tuisugaletaua o ia lea sa faia le galuega, o lea e malamalama lelei Lafai i lalo o le matou fautuaga, leaga e matou te le i omai gugu i le nofoa lenei, sa finau, ia alofagia le vai o lenei itumalo, e le o se laki la lena mea, e agai lau Afioga ini au atinae e finau, ae aua e te faalavelave mai fua o lenei e fai le sao o le Alataua....

**Afioga Hon Palusalua Faapo II:** Lau Afioga i le Fofoga Fetalai o le mea e fia faasao. E le fitu tausaga o finau le vai i i Alataua Sisifo, o lea ou te iloa o le ono lenei o Paeaiga o finau lava sui usufono o Alataua Sisifo, e le fitu la tausaga, ioe.....

**FOFOGA FETALAI:** O lea ua maua le.....

**Afioga Hon Palusalua Faapo II:** Lau Afioga i le Palemia, e umi, e umi, ae pei e foliga mai, o le sui usufono lea na saunoa, o ia lea na faia le vai, ma lou faaloalo lava.

**FOFOGA FETALAI:** E leai se mea o le a e faatulaga ai fua le talosaga o lea ua tupu tonu le mea i le taunuu mai o Alataua ma faatino.....

**Afioga LAFATELE PATRICK LEIATAUALES:** Lau Afioga i le Fofoga Fetalai, o la e sao le saunoaga a le Taitai o le Itu Agai, ua leva ona finau, a o lou taimi lea na maua ai.

Lau Afioga i le Fofoga Fetalai, e pei lava ona ou fai atu i le taimi ua sola, e leai se agaga e sii foi se ta i le afifio o le Kapeneta i le tofa loloto ma le tuualalo ia e sao lava le saunoaga a lau Afioga i le Minisita mo Aoga, Taaloga ma Aganuu, e pei ona i ai foi a tatou tuugatala, o lea ua maua mai i lenei taeao ua faalogologo mai foi lenei nuu o Falelima, o lea ua saunoa manino le Minisita, ua tatou tulalata i le maua o le tatou fund e fai ai le tatou faleaoga. E pau lava le matou fesili i le taeao lenei lau Afioga i le Minisita,

aua foi ne i tee le uluga, e matou te faamanatu ma avatu foi le tuualalo, ia po o fea o agai i ai le kolisi o lenei nuu o Neiafu na tuu e fai, o le a se fuafuaga ma se faamoemoe o i ai, o le matou tiute lea lo matou itumalo o lea e faalogologo mai e faamanatu lava, a o lea ua outou faalogologo na ona taoto ai lava faapea.....

**FOFOGA FETALAI:** Malie o lea o le a tali atu le Minisita i le fanoga o le sui usufono.

**Afioga Hon Magele Mauiliu:** Lau Afioga i le Fofoga Fetalai, o lagona lava o le sui usufono e i ai le talosaga na aumai a le itumalo, a o le vaai a le Malo i le taimi lenei i le tau faasoasoa o ana alaga-oa, ia o se atinae e faaigoa foi lea o le long term ona o la e i ai le isi kolisi e le faapea e le o i ai se kolisi o ane i ai ia tamaiti aoga. O la e i ai le kolisi i le taimi nei, ae moni lava au e vavamamao, a o le mea taua o la e i ai le aoga o la e o i ai ia alo ma fanau, ona o lea foi e taufaasoasoa a tatou faiaoga, ae le aoga foi ona fai se kolisi ae le lava faiaoga ma resources - ma le isi auala, afai lava ua outou naunau e fai sa outou faleaoga, o lenei ua fai atu o faleaoga o le mea e patino i komiti ma itumalo, e o e fai sa outou suegatupe e amata ai ona iloa ai lea o lenei e i ai lo outou fatu i ina ia ma faapena, ae o le tulaga ia o lea e tau tilotilo i le taimi le long term ma le medium long term, ia se donate e faia na faleaoga, a o le taimi nei, a tilotilo lava faale-mafaufau i ai. O le mea e aupito sili ona taua o lenei e i ai le aoga o la e o i ai alo ma fanau, o le mea lea e manaomia vave lava e outou o la outou faleaoga lea e i Falelima, o le mea lenei o lea e ave i ai le faamuamua ae le o le itumalo, ae le i galo le talosaga a le itumalo o lea lava e i totonu o api a le Malo mo se taimi o i luma. Ma le faaaloalo.

**FOFOGA FETALAI:** Malo. Tulai mai le sui usufono e faaauau le saunoaga.

**Afioga LAFATELE PATRICK LEIATAUALES:** Lau Afioga i le Fofoga Fetalai, pei lava ona ou fai atu i le taimi ua sola, o fautuaga ma timaiga e aoga e faamanatu i le Kapeneta o la e faalogologo mai itumalo, ae leai se agaga e finau atu i le taimi lenei fai loa, aua e leai lava se itumalo o toe talitonu i se sui usufono i le taimi lenei, le taimi laitiiti lava lea e totoe, e foi lava i tua le silasila a le itumalo i le amataga mai o le Paeaiga ma tulaga sa faatino ai vanonofo.

Lau Afioga i le Fofoga Fetalai, e pei lava ona ou fai atu, e toe pau lava lea o le matou talosaga i le Afioga i le Minisita mo Galuega, Felauaiga ma Atinae Eeseese.....

**FOFOGA FETALAI:** Malie le sui usufono, se i tuu atu le avanoa i le Afioga i le Palemia.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le mataupu lenei ua tele ai savali mai a le itumalo. O lenei ua saunoa atu le Afioga i le Minisita lea o lo o nafa ma le tau faasoasoina o faiaoga, ma le isi tulaga e tatau foi ona tilotilo i le aofai o tamaiti.

A o le tulaga lava ia o mea e tatau ona fai e le tatau ona tuua, pau lava le mea o le taimi. Aua o le isi lea mea o lea ua faafogafoga mai, o lea ua alu polokalame a le Minisita ma le Pulega i le taumafai e faatelevave ona aumai a tatou faiaoga, aemaise lava faiaoga o mataupu e aupito moomia, o le faiaoga Science. O le mea sili o lea ua faagasolo polokalame a le tatou Malo, ma o le taunuuga lena o le faatinoina o le faamoemoe o lo outou itumalo aemaise foi itumalo ia o lo o i ai faiaoga ia. O lona uiga, o lea ua faagasolo le polokalame.

O le isi la tulaga taua o tamaiti aua e aafia ai foi ma tamaiti. O le mea vave lava e televave ai, ia matua taofi le mea lea o le aiga fuafuaina i lo outou itumalo ae matua faasaga e faatoatele le atinae tamaiti aua o le tele o tamaiti, o le atili foi lena ona logosaia e i latou o lo o faataotoina polokalame o mea nei o kolisi i afioaga i tua. A o le agaga lena o le Malo, e pei foi ona aumai ai, e lelei lava le o o tamaiti o le itumalo latou i le latou kolisi e le tau tigaina ai e o mamao a o lea lava e nofonofo i tafatafa o le tina faatoa usu lava pe 15 minute amata le aoga. O le mea aupito sili lena, ma o le agaga lena o lea e manao i ai le tatou Malo.

**FOFOGA FETALAI:** Ia, tulai mai le sui usufono mamalu e faaiu mai le saunoaga.

**Afioga LAFATELE PATRICK LEIATAUALES:** E pei o le agaga moni lena na ala ai ona avatu le matou fautuaga foi ma le tuualalo, ona o le tilotilo a lenei itumalo i le mamao o le mea e i ai le kolisi i Asau, ae leai lava se isi agaga na ala ai ona avatu le matou tala. Ae ui i lea, o lea ua faafogafoga mai lenei itumalo, o lea ua saunoa manino le Palemia o se taimi ona agai atu lea i polokalame ia aua le faaleleia o le tatou kolisi ma le faleaoga pei ona saunoa i ai le Afioga i le Minisita mo Aoga.

Ona oo mai lea o se matou tala i le Minisita mo Galuega, Felauaiga ma Atinae Esee. E le tele so matou manaoga pei ona ou fai atu, taoto atu i autafa ma tulaga faapena, po o fea lava e aga i ai fuafuaga ma le faasoia a le Malo, na o nai moli auala lava i le agai i tai ma uta, e fai lava si pogisa o le nuu lenei, na ona taoto faapena. O le tele foi o matou lauga i taimi ua sola, pei ona ou fai atu e le tagisa. O le mea taua ua maua le matou vai o le mea aupito sili lea ona ogaoga i le soifua o le tagata soifua. Na o nai moli laiti lava na pe taifa pe tailima tai ma uta se i tau ina faamalamalama ai le agai i le aai ma tulaga faapena, ma le agaga faaaloalo.

Ia seu ia i fanua le lauga a lenei itumalo, i le paia maualuga i le nofo a Faalupea ma Aiga, lau Fetalaiga Folasia ma lena itu o le ta Alataua, malo le tapuai. O lea ua outou faalogologo mai i le taeao ma le aso lenei, o lea ua matou tatalo i le Afioga i le Minisita mo Aoga aua le tulaga o le tatou faleaoga, ia mau pea le toovae e le i fausia Roma i se aso se tasi. O la matou tala i lenei taeao, malo tapuai le tatou nuu o Falelima faapea foi le paia o le afaigaluega tofofi a le Atua o lo o galulue i lena itu o le ta Alataua.

Ona oo mai lea o sa matou faamatalaga isi ou pitonuu o Tufutafoe i lau Fetalaiga Momoemausu e te tausii vaatele aua le Tama a le Malo lau Afioga Gisa faapea foi lena itu o le ta Alataua, malo tapuai, o lea ua tatou taunuu i le siui o lenei Paeaiga. E matou te talitonu e le mafai ona aveesea la outou tapuaiga aua foi le matou alofaiva i tiute ma faiva pei ona valaauina ai e le Atua i lenei foi vai tau.



I lo matou nuu o Neiafu i lau Susuga i le Matua Tauiliili faapea foi le Aiga Samoeleoi, le Aiga na mua i malae lau Tofa i le Igoa Taatiti ma Tuaiiaufai faapea le maualuga o le ta Alataua i le saofaiga mamalu i le itupa o faletua ma Tausi, Tilomai ma Levalasi ae a Toleafoa ma le aumaga, malo tatalo, malo tapuai, o lea ua lamalama faaii le tatou Paeaiga, matou te talitonu i la outou tapuaiga ma le tatalo, aua foi lo matou faafeagai ai ma tiute ma faiva pei ona i ai si o ta itumalo. Le tatou nuu, e le o se nuu e vevesi vale ma e mau pea le toovae ma taoto i lagotonu le tulaga o le filiga pei ona i ai tulaga masani, o le matou faafetai i le tatou nuu ma le tapuaiga, faafetai le onosai pei ona i ai foi atinae e pei ona taumafai atu le tou sui usufono.

Ona faaii atu lea o sa matou tala, ia avea ia lou leo e fai ma sui usufono o lenei itumalo i lau Afioga i le Palemia aua lenei galuega tele sa feagai ai mo le tatou vai. O lea ua maua tala e taumafai lava le Taitai o le Itu Agai e faaleaga le Vaega lenei ,ae o lea ou te molimau lava leaga o au lea na finauina le vai o le itumalo lenei. Faafetai Aliimalemanu lau Afioga Tuisugaletaua, a o e seei ai i le tofi o le Minisita o Galuega, e le galo sa matou tuualalo. Faafetai foi ia Manua na ia faaauauina mai le galuega lea ua maea, o lea ua taoto i lagotonu, ua taumafa Lafai, taumafa Aeau, taumafa Motuopuaa. O la matou tala i le taeao ma le aso lenei, lau Afioga i le Palemia ma le Kapeneta, faafetai mo le matou falemai, aua e moni lava e tu i Sataua le falemai lenei, e agai mai Asau agai atu lenei itu o le itumalo ma agai atu Falealupo, o le ula lena. E le tele foi ni mea matou te mananao i ai, na pau lava lea o le mea o le falemai, o vai, o aoga ina ia mafai ona faaleleia le soifua o e o lo o alaala ma papaaao i lenei itu o le Fale Vaisigano.

Ia o la matou tala lea, lau Afioga i le Fofoga Fetalai ma le maualuga o le Maota o Samoa, matou te faamalulu atu, o le a foi se faafofoga i lenei taeao po o se tala ua paopapa i lau faafofoga Samoa, ia o aga lava ia a le sui usufono mo Alataua, e le tae lapisi, e le tae otaota e tuusao lava so matou lagona i le Malo pe a faapea e i ai ni atinae faapea. O la matou tala lea, ia manuia lau Afioga i le Fofoga Fetalai, manuia foi le tapuaiga a Samoa i ona tulaga faalupe, soifua ma ia manuia.

**FOFOGA FETALAI:** Malo. Ia, malo onosai malo foi malele i lau Afioga i le sui usufono mamalu, e le o se mea fou le lua pulugamisa ma le Afioga i le Taitai o le Itu Agai i taimi uma, e pisa lava tama a o le uso. Ia, le mamalu o le Maota, ou te vaai atu o lea ua tulai mai le isi sui usufono mo le motu tele i Salafai.

Tulai mai le sui usufono mo Palauli.

**Afioga AFOAFOUVALE JOHN MOORS (Palauli):** E muai sii le viiga ma le agaga faafetai i lo tatou Tapaau Sili i le lagi ona ua tatou aofaga potopoto i lenei taeao fou ma le manuia. Faafetai atu foi i lau Afioga i le Fofoga Fetalai le fofoga o le Maota ona o lou avanoa. Ae ao ona ou faafeiloai atu foi i le mamalu o le tapuaiga malu a le atunuu pele o Samoa, e amata mai lava i Lana Afioga Mamalu, O Le Ao o le Malo ma le Masiofo, e faapea foi le Sui o le Fono a Sui Tofia, Afioga Tuimalealiifano ma le faletua po o le Masiofo.

E faafeiloai atu foi i le mamalu o le Maota nei i lau Afioga i le Palemia faapea foi le mamalu o le aiga Kapeneta ae a lea itu i le Afioga i le Taitai o le

Itu Agai faapea le Sui Taitai ma sui usufono mamalu uma o le tatou Palemene nei.

E faatalofa atu i Ofisa Sili o Pulega ma Pule Sili o Matagaluega ma Faalapotopotoga o lo o faapea ona tatou tautua i si o tatou atunuu. Ou te faafeiloai atu foi i le tapuaiga malu a so o se Samoa lava i totonu o Samoa nei, e amata mai lava i le Taisamasama seia paia le Taiulaula sa tauilo ai manu o Malo.

E le faagaloina foi Faafeagaiga Taulagi o lo o faanonomanu i so o se malu lava o Samoa, aua a na le seanoa a outou tatalo ma tapuaiga e le manuia le Fonousu a Samoa. O outou sa ma faigata, o le a le oo atu lava i ai se leo, o paia lava foi e le avea. A o se vaivaiga o lou nei sui usufono ua ou tulai atu ai e avea au ma sui usufono o le matou itumalo pele, e i ai se taimi e oo atu ai se faamatalaga, e le tele lava. Masalo e tele atu le agaga faafetai, faafetai i le Malo e tusa ai ma le lagolagosua i talosaga ma galuega fai sa faapea ona faataatia atu e tele, tele nua talosaga ua faapea ona faaulu atu, ae paga lea, e utiuti lava le seleni a le tatou Malo. O matou foi o tagata e malamalama, o tagata ua faapea ona aoaoina, ma matou te iloa fua i luma ma fua i tua. Le tapuaiga a Palauli o lo o tui mai lava le mulipapaga aua le faasoasoina o le tamaoiga o le atunuu e le Malo nei. E ao foi ona matou faatoese atu i le Malo, o le a se sese o Palauli, e talitonu lava o lo o oso pea le la, ioe. E oso pea le la, o le a se taimi e soalaupule ma faaletonu.....

**FOFOGA FETALAI:** Malie le sui usufono o lo o saunoa e i ai se mea o lo o fia malamalama i ai le sui usufono mo Gagaemauga Nu.2.

**Tofa Levaopolo Talatonu:** Lau Afioga i le Fofoga Fetalai, o se mea e fia malamalama. Ou te fia fesili atu lava i le sui usufono po o le a le sese lea e saunoa i ai se i tau faamalamalama mai ona o lea e faatoese uma mai ia matou.

**FOFOGA FETALAI:** Aua e te tali ia Saleaula Palauli, agai pea oe e faaauau mai lau folasaga o le a oo ina manino le... Tulai mai le sui usufono mamalu.

**Afioga AFOAFOUVALE JOHN MOORS:** Faafetai lava i lau Afioga i le Fofoga Fetalai. Ia, ou te talitonu sa faapea lou uso pe i ai se sese o Palauli.....

**FOFOGA FETALAI:** Malie lava lau Afioga i le sui usufono, se i avatu le avanoa i le Afioga i le Taitai o le Itu Agai.

**Afioga Hon Palusalua Faapo II:** Lau Afioga i le Fofoga Fetalai, pe mafai ona ou tali i le fesili a Saleaula i le mea ua ala ai ona faatoese le sui usufono mo Palauli.

**FOFOGA FETALAI:** O le a le mea o le a e tali ai fua o la e na fesili Saleaula ia Palauli?

**Afioga Hon Palusalua Faapo II:** E leaga o la e le o tali mai lau Afioga.

**FOFOGA FETALAI:** E leai, o la e faasolosolo mai lana tali ona malamalama lea. A le malamalama loa ona avatu lea o le avanoa pe afai o lea. Se i tulai mai le sui usufono mo Palauli.

**Afioga AFOAFOUVALE JOHN MOORS:** Faafetai mo le avanoa. O le tagata faitio i luga o le lalolagi lenei e tumu i le sese ae na te le iloa i le tele o taimi. O le ala lea na ala ai ona ou faatoese atu aua ou te le iloa sou sese, ae ou te iloa e i ai lava le sasi. O le tulaga la lea. Faafetai lava i le Tala o le Tupe o lenei vaitau po o lenei foi tausaga ua faataatia mai. Sa ou nofonofa i le po ma matamata i tala o le lalolagi, ma faatusatusa tatou i mea o lo o tutupu i le lalolagi nei. O le atunuu lea o Eleni ua matuai faaletonu lava le tamaoaiga, fai mai le tala, e faa-tasi i le masina ona fai se toonai a le aiga i le vaitau lenei ona ua matua faaletonu le seleni i totonu o lea atunuu, ae a Samoa? E toonai lava le isi aiga i aso uma, ioe, e le sese lau tala. Ona ou mafaufau ai lea ma ou faafetai lemu ifo ai lava lea o au i lou loto i le faamanuiaga a le Alii ia te au ua ala ai ona ou fanau mai ma ou oo mai i totonu o se atunuu e talitonu ma Faavae i le Atua, E Faavae Samoa i le Atua. O le tulaga lea ou te toe faamanatu atu, o lea lava e manuia le tatou Malo, e ui ina laitiiti le seleni o lo o faapea ona faasoaso nei, a o lea e tatou te toonai lava i aso uma, o le mea moni lava lea. Ou te faamoemoe o le a faapea ona fesoasoani mai le Alii ina ia mafai ona faatamaoigaina pea manatu i taitai o le Malo, e le gata i lea o le Kapeneta a o pulega o Matagaluega eseese aua le faasoasoaina o nei seleni ua uma ona faataatia mai. E ao foi la ona ou faafetai atu i se tasi atunuu ona o lea ua maua mai le tala, e amata loa le tala faaletupe fou a lea atunuu, ia ona aumai lea o le seleni e fesoasoani i le fausiaina o le matou faleaoga. O lea ou te faafetai ai i le Malo o Iapani ma lana polokalame i le ofisa o le Amapasa e tusa ai ma lenei fesoasoani tele, aua o lea o le a amata loa le Tala Faaletupe o lenei tausaga, ia ona faapena lea ona faasoaso mai.

E faafetai ai i le Minisita mo Galuega, Felauaiga ma Atinae Eseese e tusa ai o le tele o galuega lelei o lo o faapea ona faasoaso i totonu o le tatou atunuu, aemaise foi o galuega sa faatino i totonu o lo matou itumalo, ou te talitonu o lo o taatia ai foi nisi talosaga, ae taatia atu lava i le Minisita e na te faasoasoaina ia galuega.

E faapea foi i le Minisita mo Aoga, Taaloga ma Aganuu, ou te talitonu o lo o i ai foi se talosaga i se malae, o lo o i ina lava le tautai fai mea lelei, o le a se taimi e silasila ane ai, a o le mea sili ua oo atu le talosaga.

Faafetai i le Minisita mo Leoleo ma Falepuipui ona o le puipuigamalu a leoleo i totonu o lo matou itumalo, o lo o i ai le pou o lo o faapea ona tausia ai le filemu i totonu o lo matou itumalo, e ui lava ina faigofie e leai lava ni faalavelave o tutupu mai aua o lo o mamalu le pulega mamalu a alii ma faipule, ae leai o lo o amanaia lava lo matou itumalo. O le tulaga lea ou te faafetai atu ai.

Lau Afioga i le Minisita mo le Soifua Maloloina, faafetai i le tele o faalavelave faafuasei o lo o tutupu mai, ae paga lea o lo o faapena lava ona taumafai e ui ina utiuti le seleni, a o lo o tali ma le manuia le taumafaiga o le tatou aufaigaluega. Ou te faafetai atu foi i polokalame eseese o lo o faapea ona faataunuuina e le Minisita ma le Matagaluega o Faatoaga ma Faigafaiva, o lo o faapena lava ona alualu i luma le taumafaiga a le tatou Matagaluega.

Ona faatai lea o se leo, e fia pai atu lau faafetai mulimuli i le mamalu o lo matou itumalo i le afifio o Faasisina ma Sa Lilomaiava, alaalatai Sa

Faleletaua na potopoto, Palauli ma lona Itu, ma oe Le Pule. Faafetai atu i le tapuaiga mamalu i faletua ma tausī, aumaga ae a ia saoa, e faafetai atu mo a outou talosaga o lo o faapea ona ala ai ona oo mai ma le manuia le usugafono a la outou sui usufono, ia pule alofa le Alii ma faamanuia mai ia Samoa aoao, faamanuia i lau Afioga i le Fofoga Fetalai, soifua.

**FOFOGA FETALAI:** Malo, faafetai saunoa i le sui usufono mamalu mo Palauli Sasae, malo tulei, malo fetalai i lenei vaega o le aso.

Ia sosoo le fau, tulai mai le sui usufono mo Gagaifomauga Nu. 2, tulai mai le sui usufono mamalu.

**Tofa SOOALO MENE (Gagaifomauga Nu. 2):** E momoli atu le faafetai i lau Afioga i le Fofoga Fetalai mo le avanoa ua tuuina mai e fai ai foi se sao o lenei itumalo o Gagaifomauga Nu. 2 i le Tulafono Tau Faaofi o le Faatatauina o Tupe Faaopopo (Nu. 2) 2014/2015 ma le Tulafono Tau Faaofi o le Faatatauina o Tupe 2015/2016.

O le tala e fai i le faiva o le gataifale fai mai a laga le mafua, e laga foi le lauamanu e faailo ma fetaalii le igafo. Lau Afioga i le Fofoga Fetalai e fia piiama se lagona meeme e ma le agaga faafetai ua faalimaina le viiga o le Atua lea na alausu ai lau Afioga i le Fofoga Fetalai, se i nono ni manu aua le Fonousu a Samoa, ae tainane le faatalimau o le tapuaiga mamalu a Samoa i ona tulaga faalupe.

Ia faamalo faafetai. Ia tau ia ina ia malie ma nanamu i le faafofoga a lo tatou Matai i le lagi le taulaga-osi, ma ia sautuafafafa le viiga e foi i le Atua, ae ia tatou tutumau i le fale o Ieova i aso e tele lava. Ua iloga le viiga o le Atua i Ana Auauna faapelepele, o Taulaga soifua ia a Samoa na momoli i le lagi e saili so tatou gafa i le Atua lea ua pine i Tiafau, E Faavae i le Atua Samoa.

Lau Afioga i le Fofoga Fetalai, e leai se toa e na te toe tofi Samoa, e talataua Toga, ae talatofi Samoa. O le Malae foi i Tiafau o le Malae o le Faautugatagi e atoa i ai paia ma mamalu o Samoa i ona tulaga faalupelupe e afua mai i Matia ma Matia Ituaui, o Finao ma Vaituutu seia paia le Tootoo o Fuifatu, Vailoa ma Faletoi aua le fetalaiga a Pule i Salafai. O Maauga ma Nuuasala, seia paia Malie ma Vaitoelau, seia paia Lalogaafua, tausī vaatele le susuga Lufilufi aua Tumua. O paia na, o mamalu na, o lea ua tini tauao i Tiafau nei, o lea e afio ai lau Afioga o le Fofoga Fetalai o le Maota, e te nofo i lou nofoa vaevaeloloa e faalogo ia te oe le Fonousu a Samoa, o lea e afio ai le Afioga i le Palemia, le Sui Palemia ma le Kapeneta, o outou o le muaui faalele a le atunuu lenei, e faamoemoe ia te outou le filemu ma le saogalemu, aemaise o le tamaoaiga o le atunuu lenei i o outou faiva alofi aao, o lea e afio ai le Taitai o le Itu Agai ma le Sui Taitai, o lau tuualalo, e tuualalo i le alofa ma tuualalo tonu, e mamau ai ligo o le sa o Samoa, ae aua le tuualalo i le faaoloataua e pei o lenei taeao.

E faatalofa atu i sui usufono mamalu uma o le Palemene i nai ou uso a sui usufono, o outou faiva alofilima i le tuufaatasia ma le fausia o Tulafono, o mea ia o la e femolimauai ai Samoa.....

**Afioga Hon Palusalua Faapo II:** Lau Afioga i le Fofoga Fetalai o se mea lava e.....

**FOFOGA FETALAI:** O le a e amanaia lava le lauga a Gagaifomauga o lea faatoa toe tau.....e le o ni ai avea o mea ua tatou masani ai.

**Afioga Hon Palusalua Faapo II:** Lau Afioga na ou luelue atu i le manaia o le saunoaga, leaga o la e faafogafoga mai le atunuu, faapea o le matou mea lava lea e fai o le.....o le mea lea le sui usufono mamalu, ua toe leaga lava lau lauga ua.....ia manuia lau lauga.

**FOFOGA FETALAI:** E mo lou silafia e faapena mea faa-Gagaifomauga, e soasoia mai ae sau ai ma sina tamai tui laitiiti, ioe. Toe tulai mai le sui usufono e faaauau le saunoaga o lena e lalago lelei sa o le fetalaiga.

**Tofa SOOALO MENE:** E faamalulu atu i lau Afioga i le Taitai o le Itu Agai, se o le tatou vanonofo o le ava tele atu, ae a oo lava ina see le lauga, ia o tala na faalauga, ae le tuua ai lo tatou vanonofo e tumu i le faaaloalo.

Lau Afioga i le Fofoga Fetalai ou te faafeiloai atu foi i Faauluuluga o Faalapotopotoga a le Malo le afioga i le Failautusi ma le Ofisa o le Fono Aoa, malo le galulue. Ou te faatalofa atu foi i le tapuaiga a Samoa i ona tulaga faalupelupe, Lana Afioga Mamalu, O Le Ao o le Malo ma lana Masiofo, lau Afioga i le Sui o le Fono a Sui Tofia ma lau Masiofo, le Faamasino Sili ma le Ofisa o Faamasinoga, ou te faatalofa atu foi i Taitai o Ekalesia ma le Afaigaluega o Suli ma Feoi o lo o latou amoina le Atolaau a le Atua i so o se fatafaitaulaga e nono ni manu aua Samoa.

Ou te faafeiloai atu foi ia Samoa i lona vavalolua, aua Tumua ma Pule, Ituau ma Alataua, Aiga i le Tai ma le Vaa o Fonoti, Aiga o Tama, Aiga o Nofo, Aiga o Papa ma Aiga Tafai, e faapea Faleagafulu faapea Tootoo o le Faleula, ia o paia na mai le Taisamasama o le Tuimanua seia paia Fili ma Puletuu na tauilo ai manu o malo.

Lau Afioga i le Fofoga Fetalai e fia afe se faamatalaga a lena sui usufono i lou itumalo pele, Safune ma Samauga, e le taua se sau, ae taua le faatali mau, e le taua ni tao ma le lotonuu, ae taua e latou te tuiina le mulipapaga ma tatalo. Faafetai i la outou tapuaiga, lau afioga i le Aliiolenuu, le susu o le Tagaloasusu, lau fetalaiga Tuua Tugaga le Toafia o Tulafale ma lo la toalua, ae tainane le mamalu ia te oe Safune ma Taulauniu. Afio le aiga Sa Peseta o Sao e fa, Alo o Tamaalelagi, lau fetalaiga le Tuua Sooalo le falefa ma le mamalu ia te oe Samauga, o le ta falelua na, faafetai i lau tapuaiga, faafetai i lau tatalo, e i ai taimi e lagona le vaivai a o lau tatalo e maua ai le malosia, e see ai i le malu le faatinoga o tiute o le tofi sa outou tusilima i ai, faafetai.

Ona ou oo mai ai lea lau Afioga i le Fofoga Fetalai i le Tala o le Tupe, o le Tala o le Tupe e pei o se Tala Faale-Agaga, e mafua se faamatalaga o faavae o le Tala o le Tupe lena e faavae uma mai lava i Afioga Paia a le Atua, a i ai le tagata e le talitonu i le musumusuga a le Agaga Paia, e na te le taliaina le Tala o le Tupe, a o matou e talitonu i le musumusuga, ua matua 100% le Tala o le Tupe, e leai se faaletonu, ona faapea lea ona o le Tala o le Tupe mulimuli lena o lena foi Paeaiga, e fia faaleo le agaga o le faafetai, e faaleo le agaga o le faafetai i Minisita ia i latou sa feagai ma le galuega tele i le taumafaiga o le atinae o le atunuu aemaise nai o tatou itumalo.

Lau Afioga i le Taitai o le Malo aemaise foi o le Afioga i le Minisita mo Tupe Maua, e maua le agaga o le faafetai i la oulua lea pitolaau i le faatinoina o le Tala o le Tupe e le gata i le fuafuaina a o le faatupeina o le

Tala o le Tupe. Na ou faalogo i isi lauga ia na uma atu o faitio fai mai e le o lelei a tatou tupe maua, o lo o agai i lalo a tatou tupe maua, ae ou te molimau atu o le lima lenei o tausaga o le Paeaiga lenei, o le lima foi lenei o tausaga ua oo mai ai Lipoti Faaletausaga a le Matagaluega o Tupe Maua. E 10% na siitia mai ai tupe maua pe a faatusa i le lima tausaga talu ai. Ou te molimau atu, ou te momoli atu le faafetai tele i le Afioga i le Minisita i le feagai ai ma lenei galuega tele i le tau faamaopoopoina o tatou tupe.

Na pau le tuualalo, ia filiga le tatou aufaigaluega, ou te talitonu o la e i ai avanoa e mafai ai ona siitia tatou tupe maua, aua o lea ua tatou molimau i le aso lenei, o le tatou Tala o le Tupe, ia fua i mea tatou te maua, ia filiga le aufaigaluega i le faatinoga o latou tiute.

Ona ou oo mai lea i le Minsita mo Aoga ma le Minisita mo le Soifua Maloloina, o Matagaluega nei e galulue faatasi. A soifua maloloina le tino, ia faapena foi ona soifua maloloina le mafaufau. Ae leai foi se aoga e soifua maloloina ai le mafaufau ae le atoa lelei le malosia o le tino. Ona ou faapea lea, e momoli atu le faafetai i lau Afioga i le Minisita mo Aoga, faafetai mo galuega sa faatino mo le itumalo e ala i faleaoga sa faatinoina, o malae taalo, o pa sa siomia ai faleaoga, ae le gata foi i lea o le tulaga o le anofale pei ona maua foi i nisi o sui usufono. O lou lea talitonuga, o lo o lelei faafae le faatinoga o galuega. E sao lau saunoaga i le taimi ua sola, o se taimi mulimuli ane po o le lima i le fitu tausaga ua fua mai le galuega tele o lo o feagai ma lau Afioga.

Lau Afioga i le Minisita mo le Soifua Maloloina, o lea foi e i ai le talitonuga sa faatino la tatou galuega. Faafetai mo le falemai, faafetai mo le galuega sa faatino mo le itumalo. E talitonu foi e le na o lenei itumalo, o itumalo uma lava aemaise foi o si o tatou atunuu, ae malo faafetai, ua le na o fale. E tele foi polokalame taua o lo o faatino e le soifua maloloina, e le gata i le soifua manuia mo tagata lautele, ae faapea foi i aoga, le tatou Komiti o le SPAGHL. O lea matou te molimauina ai le taua o a outou Lipoti e aumai i totonu i le taua o a outou asiasiga ma la outou auaunaga e ala i alo ma fanau a lo tatou atunuu. Faamalo faafetai.

**FOFOGA FETALAI:** Malie lava le sui usufono mamalu, o le a se mea.....

**Tofa Levaopolo Talatonu:** Lau Afioga i le Fofoga Fetalai, e i ai se mea e fia fesili atu ai i le Afioga i le sui usufono mamalu, ona o lea ua faalogologo atu ma le totoa po ua lima faafetai i le vaega o le auaunaga lea. Lau Afioga i le Fofoga Fetalai, ou te iloa o la e ua misi ia te ia ambulance foi ia e faia le fesoasoani muamua. E le o lelei, leaga ua vaai i ai ou mata i le taavale, na o le fata lava le mea lea ae leai ni masini o latou faia le auaunaga, ai ua misi ia te oe le mea lena.

**FOFOGA FETALAI:** O lea ua maua le finagalo o le sui usufono. O lea ua ou maua. Ina ne i meaane ua.... Se i tulai mai le sui usufono mo Palauli le Falefa.

**Afioga Hon Faumuina Tiatia Faaolatane Liuga (Palauli le Falefa):** Lau Afioga i le Fofoga Fetalai, o Soalo e alu faatolu i le vaiaso i Savaii, a o le Afioga i le sui usufono na saunoa nei e tasi lava pe faalua i le tausaga ona alu

i Savaii. E faapefea la ona ia iloa le leaga o le taavale pe afai e seaseā alu i Savaii? Ma lou faaaloalo.

**Tofa Levaopolo Talatonu:** Lau Afioga i le Fofoga Fetalai, ou te le tau alu. O le tofa a le matou itumalo, ia e nofo e matua fai lava lau galuega na tuli atu oe e fai. Leaga o le mea sao na ou vaai i ai, e le i leva nei lava ona ou vaai i le mea leni. O le o atu o tagata i le ambulance lea, e oo lava i le aufaigaluega e le iloa faatino se mea.

**FOFOGA FETALAI:** Ia o lea ua ou maua. Ou te faaeteete i le itu lea lau Afioga i le sui usufono mamalu Levaopolo.

**Tofa Levaopolo Talatonu:** Lau Afioga silasila totoa i le itu lena leaga o lea ef ai si tuga o le tuuaiga o le Matagaluega. Ae i ai foi le agaga aua a tapa nei mea tau faamaumauga, ona ou manatu lea o le a tatou laa i le isi tulaga. Ae malie o lea e sagatonu lava le saunoaga a le sui usufono.

Ia se i tulai mai lau Afioga i le Minisita mo le Soifua Maloloina.

**Afioga Hon Tuitama Talalelei Tuitama:** Lau Afioga i le Fofoga Fetalai, ua maea ona lauga le sui usufono lea, a o lea pei a toe lauga faalua i luga o le lauga a le isi sui usufono ae ou te talitonu e le talafeagai ma aga faa-Pelemene. O se soli Fono. Ma lou faaaloalo.

**FOFOGA FETALAI:** Sooalo, o lena e sagatonu lau lauga. Taatia le atugaluga o Saleaula o lea ua tali sao le Afioga ia Faumui e faamalamala le tulaga lea o la e lelei tatou ambulance.

Ia, tulai mai lau Afioga i le Palemia.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, masalo o mea faapenei o lea e faamaumau e le Minisita mo le Soifua Maloloina e tali mulimuli i ai. Ae lelei ona ou tali vave atu, aua ou te le iloa po o le a lea ambulance na tilotilo i ai le sui usufono mo Gagaemauga Nu. 2, aua o ambulance e equipped uma lava i mea ia. Masalo e i ai se taimi ona faatoa faasao lea o mea ia, leaga o lea e faafofoga mai le atunuu pei e le o se atunuu foi lea e iloa fai mea. O mea o taavale nei e taua o ambulance, e equipped uma lava i mea uma faatatau i faalavelave mea faapena. Ae a oo i le taimi e tali atu ai matou, ona faasaosao uma atu ai lea o mea uma nei, aua o la e faafogafoga mai i latou o lo o nafa ma le tautua lea. E ese lava tatou mea foi nei tatou te sua ai i totonu o inei, ae a oo loa i mea faapea, e le tataua ona faatemeteme i ai se isi aua o mea e aafia ai le soifua o le atunuu.

**FOFOGA FETALAI:** Mo le faasaoina o le taimi o le sui usufono, ou te tapa le Afioga i le Taitaifono o le Komiti o Tupe Maua ma Tupe Totogi.

**Susuga Hon Papaliitele Niko Lee Hang:** Lau Afioga i le Fofoga Fetalai, faafetai mo le avanoa.

Ou te fia malamalama i le saunoaga a le sui usufono mo Gagaemauga Nu.2 i le ambulance lea na saunoa i ai. Pe le o le taavale fuimu lea e faaoga e latou, aua e i ai taavale fuimu pei ni ambulance. Po o le sao lea?

**Tofa Levaopolo Talatonu:** Lau Afioga i le Fofoga Fetalai, e le o se tala pepelo le mea lea ou te fai atu ai.....

**FOFOGA FETALAI:** Levaopolo, alofa mai o lea ua ou faauma atua le mataupu.

**Tofa Levaopolo Talatonu:** Se musumusu atu i le Afioga i le Palemia.....

**FOFOGA FETALAI:** Taatia mai le mataupu ou te manatu o lea ua manino, o le a i ai se taimi ona folasia lea, a o le tuuaiga, o le itu lena e aupito sili ona liolio i ai leaga o lea e faafofoga le atunuu faapea le Matagaluega, ma ou te molimau atu o la e foi e i ai le matou falemai i Safotu. O ambulance uma e oo atu i le tatou itulagi lea, o taavale fou uma. E leai se tulaga faapea ne i te i ua... ae manaia le fesootai sao i le Minisita e ave tonu i ai le mataupu i le tulaga aloaia ma faaoo i ai tulaga o le atugaluga lea e pei ona faailoa mai. Tulai mai Soalo e faaauau mai le saunoaga.

**Tofa SOOALO MENE:** Faafetai i lau Afioga i le Fofoga Fetalai mo le avanoa.

Ona ou oo mai lea i le Minisita mo Faatoaga ma Faigafaiva. Ou te iloa o le Minisita lava lea e aupitio laitiiti lona tino se i tulou o lou gutu ma le afi, ae ou te iloa o le Minisita aupito sili lea ona tele le loto. E tele ni manulauti ua ausia foi e le Afioga i le Minisita. E pine lau faamatalaga ona o si ou itumalo o le olataga lea o le itumalo o uta i le vao. Ua alu alu le lauga o pusatalo, ua uma talo ae o lo o moomia lava i fafo. O le mea lea e momoli atu le agaga faafetai, ae le gata i lea o le tulaga i meaai po o le food security lea na muamua lava ausia e tatou i le ogatotonu o le tatou Paeaiga lenei. E momoli atu ai le faamalo ma le faafetai ma le faamalo. Na pau lava lea o le matou tuualalo, faaoga lelei le polokalame lea a le SACEP ia matua siitia ai le tulaga o faatoaga ma faigafaiva ina ia tele sona sao e ala i le pasene lea faatusa i le tatou GDP. Na pau lea o se matou tuualalo.

O le agaga faafetai i le Minisita mo Leoleo ma Falepuipui, Minisita mo Tina ma Tamaitai, Atinae o Nuu ma Afioaga ma Agafesootai ma le Minisita mo Faamasinoga ma Pulega tau Faamasinoga, ou te talitonu o la outou galuega e faifaatasi. O outou o lo o mapu i ai ma toa i ai si o tatou atunuu i le tulaga o le saogalemu ma le soifua lelei i totonu o nuu ma afioaga. Ou te talitonu a lelei le faatinoina o outou tiute ma outou faiva, e faigofie foi i le Matagaluega o Faamasinoga e le toatele i latou e autovaa atu i le Matagaluega o Faamasinoga mo solitulafono ma faamasinoga.

Ae momoli le agaga faafetai mo galuega o lo o maitauina pea le toalelei ma le toafilemu o si o tatou atunuu e aunoa ma se vevesi. Ona ou oo mai lea i si au Minisita, le Minisita mo Pisinisi, Alamanuia ma Leipa, Fefaatauaiga aemaise foi le Minisita o Faalapotopotoga Tumaoti a le Malo, ou te talitonu o la outou galuega ma la outou pitolaau, e ese foi le taua e tua i ai le tamaoiga o le atunuu. E tele faitioga ua tuuina mai e nisi o sui usufono, ae ou te talitonu, e le o nofoai le tatou Matagaluega e faatino la outou galuega e ala i le auina atu o oloa i fafo, o le faatupulaia o tagata faigaluega ae le gata foi i lea o le Afioga i le Minisita ia Lautafi, e taua foi lana pitolaau lea. Aua ou te talitonu o lea ua aumai le sini faavae o le Tala o le Tupe, e fua lava a tatou galuega i a tatou tupe maua. Ou te talitonu o le a tele se sao o le Matagaluega



fou lea i le faatupeina ma le fsoasoani i le tuufaatasia ma nisi foi tupe faaopoopo e faatino ai a tatou atinae.

Ona ou oo mai lea i le Matagaluega o Galuega, Felauaiga ma Atinae Eeseese, Matagaluega o Punaoa Faanatura ma le Siosiomaga ma le Matagaluega o Fesootaiga ma Faamatalaga Tekonolosi, faafetai i la outou galuega, ua taatitia auala, ua fai o tatou taligalu, ua i ai galuega tetele ua faatinoina, aemaise foi e o faatasi ma fesootaiga faaonaponei, ia lalago faatasi i le faatupulaia o pisinisi ma alamanuia eseese i totonu o le tatou atunuu, atoa ma tagata lautele. E momoli atu ai le agaga faafetai ma le agaga faamalo.

Ona ou oo mai lea i si ou itumalo, e talitonu e le tagisa pei ona ou fai atu i lau lauga muamua, e le tagisa lenei itumalo. O le a lava le mea e aumai o le mea lena, na pau lava lea o le mea, ia vaai lelei le itumalo. Ou te le fai atu foi a mea ou te toe tagi atu i se isi mea. Na pau lava lea o le mea, o lea ua taoto atu manaoga o lenei itumalo i a outou Afioga i Minisita, o le a ou faatalitali, ae talitonu lava o le a to se matupalapala o lenei itumalo i le taimi vaapiapi lea e i ai o lenei foi Paeaiga.

Ia, o se leo vaivai lea o lenei sui usufono lau Afioga i le Fofoga Fetalai, e faaleoina ai le agaga faafetai ma le agaga fiafia o lenei Itumalo e faafetaia ai galuega tetele sa faafeagai ma le Afioga i le Palemia ma le Kapeneta amaise foi o le Malo, e le gata o le faatinoga o galuega mo si o tatou atunuu aemaise foi o nai o tatou itumalo. Ona faapea lea o sa matou faamatalaga, o le a foi, ia agalelei mai le Alii, e leai lava se tautai e atoa, afai na sese se faitau o lau valaau, ia lafo le maeaalalo, aua ne i tuufau aua a gapa le fau, e gapa ae le gau, ae a gapa le toa, e gapa loa gau. Ona faapea leai, ia lafo ia i le vasaloloa se upu ua sala ai se gagana a lenei itumalo o Safune ma Samauga, ia manuia le Fonousu a Samoa.

**FOFOGA FETALAI:** Malo faafetai saunoa i le sui usufono mamalu mo Gagaiformauga Nu.2. Ia o lea ua sauni mai le sui usufono mo Faasaleleaga Nu.4, Afioga Peseta Vaifou Tevaga. Tulai mai e fai se sao ia Manuvao i le Tala o le Tupe aua le tapuaiga a le tatou itumalo.

Tulai mai le sui usufono mamalu.

**Afioga PESETA VAIFOU TEVAGA (Faasaleleaga Nu.4):** E muamua ona ou faamalo ma faafetai i lau Afioga i le Fofoga Fetalai ua maua le laolao o lenei itumalo. E muamua foi ona ou faafeiloai atu ma ou faatalofa atu i tulaga faalupe o le Maota i le afio o lau Afioga i le Palemia, afio le Afioga i le Sui Palemia, le mamalu i le Aiga Minisita o le Kapeneta. E faatalofa atu foi i lena itu o le Malu i le afio o lau Afioga i le Taitai o le Itu Agai, Sui Taitai ma le mamalu o le Palemene ua potopoto. E faapea foi ona ou faafeiloai atu i Ofisa Sili o Pulega ma Pule Sili o Matagaluega ma Faalapotopotoga a le Malo, lau Afioga i le Failautusi o le Fono aemaise o le maave eseese o le Matagaluega a le Fono o lo o faapea ona tatou faatasi ai i le Fonousu i lenei taeao na lua.

O matua o le lauga a Faasaleleaga Nu. 4, 'o le matua lote mea,' o le matua lea o le lauga a lenei itumalo sa faataupou i ai lou uluai oo mai i le Maota lenei i le 2011. O lea ua talanoaina le Tala o le Tupe i lau faasoa utiuti ma lau faasoa faalelava, ae a le tali mai a le atunuu? E le o fiaai Samoa, o lo o manuia le atunuu. Ae ou te le i oo mai i le Maota lenei, sa i ai se manatu autu ou te fia oo mai e tatou te lote mea faatasi. Lau Afioga i le Palemia e avatu le

faamalo po o lau Afioga foi o lau Minisita, e avatu le faamalo ma le faafetai i lou itumalo, ua e filifilia ai lou nei sui usufono e ta te galulue faatasi ma tatou lote mea faatasi ma lo tatou Malo. E tele mau a nisi o le atunuu ua faapea mai, ana lote lava se mea se tasi o manaia, o le tatalo a lenei itumalo i lau Afioga ma le tatou Faigamalo, a tele mea e lote e manaia. A lea ua tatou molimauina i lenei Maota, e tasi lenei galuega tele, amuia foi o tatou uso a sui usufono po o a outou Afioga foi i Minisita, ua i ai galuega vaaia ma galuega e molimauina ai lenei taimi o lenei foi lima tausaga o lenei Paeaiga, e tatou te le mailoa, pe i ai nisi o lenei Maota tatou te toe foi mai i le Paeaiga o lo o sosoo mai. O le agaga fiafia o lou sui usufono, ua i ai ni galuega vaaia ua faia e lo tatou Malo e faamanatu ai o tatou taimi po o lou foi taimi i lenei lima tausaga, o le aoga lea o lea matua, o le matua lote mea. So o se matua lava i lona aiga, e tautua, ma fautua ma aoao i lona auai, e faapena foi i nuu ma afioaga i pulega mamalu a alii ma faipule, a lelei i latou o lo o ave ai le faamuamua o nuu ma afioaga, e manuia foi lena afioaga, e faapena i totonu o le tatou Malo, o le mea lea e momoli atu ai lau faamalo ma lau faafetai ona o galuega vaaia. O lea e le i uma lenei Paeaiga, faafetai i lau Afioga i le amataga o lenei tausaga ua uma ona e sainia le MOU e fausiaina ai le uafu tele ua fia tausaga o tau i Vaiusu ma Vaitele, o le agaga lea e momoli atu ai le faafetai tele.

**FOFOGA FETALAI:** Malie le sui usufono, se i tulai atu le Afioga i le Palemia.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, e manatua le mea lea e fesili ai le Minisita Lagolago, pe toafia o tatou lea e toe foi mai.

O le Paeaiga talu ai, e ova atu i le afa e le i toe foi mai, ae o le mea foi lenei o le lote mea, o le muamua lava o le faanoi muamua lote loa, o le mea lena e toatele ai tagata e oo i ai faalavelave o le lote muamua ae faanoi mulimuli.

O le mataupu lea sa saina ananafi o le faaleleia o le uafu la e i tai, a o le uafu lea e i i Vaiusu, ia o le uafu lena o lea e faatalanoaina pea i le taimi lenei aemaise o lea e i ai le study lea e fai i le ADB. Ia o le tulaga lena, ana e musumususu mai, ou te tau atua le sao.

**Afioga Hon Palusalua Faapo II:** Lau Afioga i le Fofoga Fetalai o se mea e fia malamalama ai le sui usufono.

**FOFOGA FETALAI:** Se i tulai mai le Taitai o le Itu Agai.

**Afioga Hon Palusalua Faapo II:** O lea e foliga mai o lana Minisita le Afioga i le Palemia, a o lea e le malamalama i le MOU lea na saina, ioe, o lea ua faasao atu e le Afioga i le Palemia, o tai, se se i fai ma outou talatalanoa ma fai ni fonu.....

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** E fai ma ma talatalanoa, a o le faalavelave la lau Afioga i le Fofoga Fetalai, e i ai le mea na toesea ai i le matou fonu talu ai i le Aso Gafua, ia o i ina la lea ua misi ai ia te ia le mea lea.

**FOFOGA FETALAI:** O le mea e faasao, o lea ou te maua lelei le saunoaga a le sui usufono mo Faasaleleaga Nu. 4, o le MOU i Vaiusu o lea na te aumaia, e ese ai le MOU lea na saina ananafi, le sui usufono mo Faasaleleaga Nu. 4, o le sao lea o lau saunoaga?

**Afioga Hon Palusalue Faapo II:** Lau Afioga, po o Vaiusu po o Matautu, e tatau ona ia silafia aua o le Palemia o lana Minisita a o ia o lana Minisita Lagolago.

**FOFOGA FETALAI:** Le Taitai o le Itu Agai, ua lava lena. Le sui usufono mo Faasaleleaga Nu. 4, o lea e sagatonu lau lauga o lea ou te maua o le amataga o le tausaga lena lea na saina ai le mea lena i Vaiusu, pe afai o le sao lea. Tulai mai le sui usufono mamalu.

**Afioga PESETA VAIFOU TEVAGA:** Lau Afioga i le Fofoga Fetalai, masalo ana malamalama lelei le Taitai o le Itu Agai, pe saina e le Palemia pe ou te saina le MOU, e leai lava se mea e popole ai. Ua galo ia te oe e fia miliona lea na ou saina i o ia....?

Ia lau Afioga i le Fofoga Fetalai, o galuega lelei ia, o le vaiaso na tea nei lea ua eli le eleele o le malae vaalele i Faleolo, o le aso 23 o le masina fou, o le a amata ai ona fausia le malae vaalele tele pei o la foi atunuu i fafo.

O le manulauti o le tatou Malo, o mea e lelei i la atunuu, e lelei foi i Samoa, o mea la ia o lea e tau faataitai atu i le Itu Agai ma le latou vaega.

O lea ua faalogologo.....

**Afioga Hon Palusalue Faapo II:** Lau Afioga i le Fofoga Fetalai, ona o lea ua taua mai le matou itu.

**FOFOGA FETALAI:** Ia malie le sui usufono, leaga o lea ua e taua le.....

**Afioga Hon Palusalue Faapo II:** Leaga e taua tele le mea lea ua oo i ai le saunoaga a le sui usufono mamalu, o lea ua faapea mai, o le mea e lelei i atunuu i fafo, o le mea lelei foi lena i Samoa, ae galo ia ia o Savaii, ioe.

**FOFOGA FETALAI:** O Samoa o fea o tu ai Savaii, Palu? O Savaii la e tu i Samoa, Palu?

**Afioga Hon Palusalue Faapo II:** O le mea e lelei i Apia, e lelei i Savaii, a o lea o le a outou o i atunuu i fafo, o la e tele le faaletonu i Savaii. Ia o le mea lea e faamanatu i sui usufono mamalu e sau mai Savaii, aua e te vaai i fafo ae vaai i Savaii, ioe.

**FOFOGA FETALAI:** Ia o lea ua maua, o lena e sagatonu lau fetalaiga le sui usufono mo Faasaleleaga Nu. 4, o Samoa lea e te taua, o Samoa e i ai Savaii, Upolu, Apolima ma Manono, o lena e sagatonu o le manulauti lena o le Paeaiga fou. Tulai mai le sui usufono mo Faasaleleaga Nu. 4.

**Afioga PESETA VAIFOU TEVAGA:** Ia e aoga foi le lauga a Faasalele e ao mai ai e le Itu Agai ia manatu, e tele galuega lelei a le Malo na faatino, e pei lava ona ou avatu, pe ou te toe foi mai i le isi Paeaiga pe leai foi, e le galo

au i lou itumalo, e vaai loa i le fale lenei, e manatua Peseta, e vaai i le Maota Gasegase i Motootua, e manatua le tofi lenei. O le malae vaalele, faafetai i lau Afioga i le Palemia o lea o le a fai e le i uma le Paeaiga.

E 40 tausaga o feagai le Nuu o le Atua i le pologa e 40 tausaga, e 53 tausaga o lea faatoa fai lava lea o le auala galue o si ou nuu. Lau Afioga i le Minisita mo Galuega, Felauaiga ma Atinae Eseeese e avea ai au ma sui usufono o si ou nuu o Puapua e momoli atu ai le faamalo ma le faafetai tele, amuia foi au i lou taimi, e 53 tausaga o tautua isi sui o le itumalo lenei. Ae ou te faafetai ma avatu lau faamalo i lau Afioga ua e faia mea silisili e le galo ai au isi ou nuu, leaga o oe o Mose na tofi e le Atua e te alu i o e aumai Isaraelu, o lea la ua uma le pologa o si ou nuu, a o lo o feagai pea si ou nuu o Asaga i le pologa, e ala i le taeao e usu ma tau atoato i le maumaga, talofa, e faapea foi isi ou nuu o Lano.

O taimi uma lava ou te savali ai ou te koleni i le malae tapolo, a ou vaai i le auala ta, talofa e, ia na ona faapena atu i lau Afioga i le Minisita, ona o le utiuti lava o le faasoa a lo tatou Malo, faafetai faamalo pule, ua lava lea, o lea ua i ai se mea e tau ai au i lenei lima tausaga isi ou itumalo.

Lau Afioga o le Aso Tofi o le a faatasi ai lo tatou Malo i le tatala aloaiaina o le auala galue o si ou nuu, e le mama la ia Faasaleleaga Nu. 4, e le mama ia Puapua lau faaloalo aemaise lo tatou Malo, e pei lava ona ou avatu e 53 tausaga o pologa pea lenei nuu, ia ona o lau Afioga o le Tiakono Toeaina i totonu o le tatou ekalesia, masalo o le mea lea ua ave ai lau faamuamua. O le aso ananafi, sa ou faalogologo ai ma le totoa i le lauga a se tasi o ou uso a usufono mai Faasaleleaga Nu. 3, uma le lauga atoa na o le faafetai i le Malo, faafetai i galuega tetele. Afai o manatu mai lau Afioga i le Minisita mo Galuega i se isi galuega mo lou itumalo, ia faamuamua le itumalo o Faasaleleaga Nu. 3, leaga o Faasaleleaga e sa ai leaga na o lelei lava. O le mea lea e momoli atu ai lau faafetai i lou uso a sui usufono.

O lea ua ou faalogo o le a faaleleia nisi o auala sa ou talosaga atu ai.....

**FOFOGA FETALAI:** Ou te vaelupeina le saunoaga a le sui usufono mamalu, ona lea ua tatou taunuu i le tatou taimi malolo, o le a avatu le avanoa e faaauau ai le saunoaga pe a tatou foi mai i le tatou malologa masani o lenei aso.

E faasilasila atu o le a faataatiaese Taulumaga a le Fono Aoa o lana malologa masani o le taeao.

*Na faataatiaese Taulumaga a le Fono Aoa i le itula e 10:45i le taeao malologa masani ma toe faaauau i le itula e 11:26 i le taeao.*

**FOFOGA FETALAI:** Malo, ia e ese foi le apatuna ia. O le tatou agai fou lena e soosootauau ia ma le tautua afu ma le tautua toto a le tatou agai ua ova i le 40 tausaga o galue i le tatou Maota Fono, o tapenapenaga uma nei aua le fausia o le tatou fale fonofou, ia oo atu i ai ua savavali uma le au tautua a le atunuu e fai foi o le tapenaina o le Maota ae o lona anofale, o lea ua amata ona koleni atu i le aso. Ua uma foi ona ave i ai le aveai ia tatou feiloai ua feiloai ma lona malofie fou lelei, ina ia atoatagi le tapenaga aua lo tatou Maota.

Ia ae faafetai atu i lenei vaega o le aso, o lea ua tatou taunuu mai i le taamilosaga lona lua o le tatou Fono, faamalo atu le onosai, faamalo foi i le taimi ua sola mai le taeaoaena, na uluai saunoa ai nisi o sui usufono mamalu o le tatou Maota - ma o lea ua tatou taunuu manuia ona ua maua le faasiliga malosi e ala i le taliga o le sua, faafetai i le Atua i kalasia ua foai e faaopoopoina ai lo outou malosi i le tino, agaga ma le mafaufau e faaauau ai tatou galuega.

E faia le tatou malologa o faia le saunoaga a le sui usufono mamalu mo Faasaleleaga Nu. 4, le sui usufono ia tulai mai e faaauau le saunoaga.

**Afioga PESETA VAIFOU TEVAGA:** Faafetai i lau Afioga i le Fofoga Fetalai, ua maua foi le faasiliga malosi i lenei taeao matagofie o le malu taeao - ma e motusia le lauga a lenei itumalo ua tau faaiuiu atu se manatu i le Matagaluega o Galuega, e lagona ai le faafetai, faafetai i lau Afioga i le Minisita. E pei foi ona silafia e lau Afioga ia le auala mai i nisi foi o lou nuu o Puapua, ia e le mafai ona ou natia lea tulaga leaga o lo o faafogafoga mai lou nuu, o nai vaega lava e faaleleia, peitai o la ua foi i Salafai ma le agaga fiafia ma le agaga faafetai o lea ua avatu le tali a lau Afioga, o lea o le a faapea ona faaleleia ia vaega ae le i feiloai le tatou Malo mo le umusaina o lenei aualatele.

E momoli atu ai foi le faafetai i le Afioga i le Pule o le Matagaluega o le LTA, lau fetalaiaga Leasi faapea foi le fetalaiaga Mataafa, o lo o faatautaia le Matagaluega o Galuega i le motu tele i Salafai ma a outou galuega fita o lo o feagai ma le Matagaluega, faafetai, faafetai tele ona o talosaga a lenei itumalo, o lea ua talia, o le mea lea e momoli atu ai lau faamalo ma lau faafetai.

Ona oo mai lea i lau Afioga i le Minisita mo Aoga, Taaloga ma Aganuu, o le faafetai o lea ua manino i lenei taeao ma le tele foi o Fonotaga o lea ua maua le talosaga e uiga i faleaoga - ma e moni ai lava le saunoaga a lau Afioga i le Minisita, atonu o le utiuti o seleni a lo tatou Malo - ma e talitonu foi, o lea ua manino ma malamalama i le faafogafoga a se tasi o nuu o lou itumalo i Asaga, o faleaoga, ia o lea ua faamuta ia fesoasoani mai foi a nisi o malo tetele sa mafai ona fesoasoani i le fausiaina o faleaoga a lo tatou atunuu. O le mea lea lo tatou nuu o Asaga, ia lototetele aua le popole, o lea e le i oo i le taimi e faaiu ai lenei Paeaiga, ia tatou galulue faatasi ma lo tatou nuu e fausia lea faleaoga e aoga mo alo ma fanau a lo tatou nuu.

Lau Afioga i le Minisita mo Punaoa Faanatura ma le Siosiomaga, e momoli atu foi le faafetai a lenei itumalo, faafetai tele i le tele o taimi o ta feiloai ma e fesoasoani mai foi i talosaga foi a lou itumalo o lena ua faataoto ma faataatia i lau Afioga ma le Matagaluega. O i tonu lava i le mea lea o le a umusa ai le auala galue a lou nuu, o i tonu lava lea o le a fai ai le umusaga, lea e i ai tonu le malumalu lea na faaleagaina i le afa o Evani i le tele o ona magavai, o le taua foi lea o lenei galuega, se i silasila foi i ai le Malo i mau o lo o taumafai atu ai i le soifua ma le ola e puipui le saogalemu o lou nuu, o lea ua aveese lea Malumalu Sa ona ua le o toe saogalemu ua latalata mai ia le sami i uta, ae ou te faafetai i lau Afioga ona o lea ua e tali mai, e tasi le aso na ta feiloai ai avatu le talosaga aumai le tali a lou ofisa, o lea ua ave i le Pule o le Matagaluega e silasila i ai, afai e talafeagai i lenei Paeaiga, faafetai. Ae afai foi o le a se taimi, ia na ona ou faamanatu atu, ne i te i ua toe afaina, o lumamaota ma tualaoa i le vaega tonu lava lea o Puapua lea o lo o avatu ai le

talosaga. O lena ua pue atu ata ua silasila i ai lau Afioga ma le Matagaluega i le tele o mea ua faaleagaina. Na ona taoto atu lava i ina i lau Afioga pe a lava le faasoa.

Lau Afioga i le Minisita mo le Soifua Maloloina, faafetai i le falemai o le matou motu i Salafai o lea ua toe faaleleia, aua e ui lava i le tele o maota gasegase i nuu i tua i le motu i Salafai, ae pei lava o Tuasivi pei o i lava e taunuu i ai ia Matagaluega o le Soifua Maloloina, o lea ua asia o lea ua tele lava ia le tele o galuega ua uma ona fausia, o lea e momoli ai le faafetai i lau Afioga, e tele foi mea e matou te agiagi atu i lau Afioga ma le Matagaluega, ae ou te faafetai o lea ua talia ma faatinoina e le Matagaluega, o le Matagaluega foi a lau Afioga o se Matagaluega tele i totonu o le tatou atunuu, e tele auunaga, e tele taimi galue, o le ao ma le po. Faafetai i lau Afioga, o lea ua manaia le Maota Gasegase i Motootua, a o le tatalo, o lo o i ai nai vaega se i toe silasila i ai lau Afioga. Sa ou asia ia se tasi o gasegase o lou aiga, tulou, i le Aso Sa na tea nei, o le teineitiiti lea na lavea mai Savaii na taalo i le lakapi liki ona afaina ai lea o lona vae. Ua ou oo atu ma asi i le Aso Toonai ma le Aso Sa, faafetai o la ua manuia le taotoga, ae pau lava lea o le mea pei o lea o lo o lagona ai e ia le mafatia, ia ou te le faitio foi ona o le moega lea e taoto ai, atonu foi o fesoasoani mai fafo e le faatusalia foi ia ia foi malo, le Malo o Saina e le faatusalia i o tatou tagata e uumi tele o tatou tagata, ae o le moega lea pei lava ona ou avatu, e puupuu, o la e fetui mo lea Malo, ae ona o le teineitiiti lea e fai sina umi, e tatalo atu lava i lau Afioga i se tulaga foi lele pe mafai ona i ai ni nai moega e mafai ai ona faasolo i tua ia pe tumau pea le ulu o le moega, ae aveese tua o le moega, ina ia mafai ona sao loa le taotoga o i latou o lo o gasegase, se i silasila ifo lava i ai lau Afioga o le moega fou lava, ae pei lava ona ou avatu ona o tatou tagata e uumi le tele o tagata, a o tulaga uma lava e pei ona i ai le auunaga, e avatu ai le faamalo ma le faafetai, faafetai foi i le Faauluuluga o le Matagaluega, e avatu foi le faafetai ma le faamalo i alii ma tamaitai fomai o le au galulue ma le auunaga o lo o latou tausia le ola soifua maloloina o le mamalu o le atunuu o lo o gasolo atu i le tatou falemai.

Lau Afioga i le Minisita mo Faatoaga ma Faigafaiva po o lau Afioga foi o le toe ulutaia, o se vaaiga ese lena i lena foi Paeaiga i le maitau a lo tatou atunuu i faaleleleaga, ua le toe fiaai le atunuu, faamalo i le Matagaluega ma le aufaigaluega, faamalo i lau Afioga, ae ou te talitonu, e ui lava i le galulue o le aufaigaluega ae a aunoa ma le faamalosiaua a outou Afioga e taitaia Matagaluega i a outou Afioga i Minisita, o le a faapea ona le ogatasi ma le faamoemoe o le aufaigaluega. O le mea lea e momoli atu ai le faamalo ma le faafetai tele a lena itumalo, ona e oo foi isi o matou motu i Salafai pei foi ona saunoa se tasi o sui usufono mamalu, ia sa tele foi ina faitio le toatele i le leai o se mea e ave i ai le tatou talo, ae o le a le taimi nei ua i ai? Ia o lea ua tau sue talo, ae ou te faafetai e ui ina faaitiitia le talo o lo o auina atu i fafo, ae o lo o tele lava le meaai o lo o tua i ai lo tatou atunuu, o le vaega fiafia ma le vaega taua lea.

A outou Afioga i Minisita faamalo galue, a o outou tiute ma faiva e le faigofie le vaaiga o Matagaluega ma Faauluuluga, o lo o outou silasila pea i le ausaga o le tatou Malo, e manuia ai o outou faiva.

Ae le i faaumaina lau lauga, se i ou oo atu i si ou itumalo pele o Faasaleleaga Nu.4. Le paia e o le tatou itumalo, ou te le tau talatalaina le ivi lavelave o le ta itumalo, ou te le tau laulauina foi le sao o le ta itumalo, ae ou

te faafetai i la outou tapuaiga ma la outou tatalo, aemaise o Auauna o le Talalelei o lo o nonomanu ma faafaletuluia i lo tatou itumalo aua se manuia o Faasaleleaga Nu.4.

Faamalo tapuai, faamalo i lau faaaloalo, o lea ua toe o siui ona tatou taunuu lea i le faaiuga o lenei Paeaiga i la outou faaaloalo ua mafai ai ona ou oo mai i le Maota lenei e vae ma lima i ai le itumalo, aemaise o le tautua i si o tatou atunuu. Tatou tuu i luma o le Atua i Lana faasoa ma Lana puleto e mafai ai ona taunuu i le manuia mea uma.

O le mea lea le tatou itumalo i le paia e o Satuala, afio Vui, afio Matafeo, afio Vaiouga, afio oe Falenaoti. O le tatalo a Peseta, ia manuia lenei lima tausaga o le Paeaiga o totoe. Ni a fa au i le tatou itumalo, ou te le taea la outou faaaloalo. Afai o le a se tulaga ua alofaiva i ai lo ta itumalo, i la outou faaaloalo, e talia ma le faafetai. Ona ou manatu lea le tatou itumalo e, ia, o ni faaletonu ma ni sese i le auunaga a la outou auauna, afai ua le tautamalii, ia malu ave i fale i totonu o le tatou itumalo ma le atunuu. A o le agaga mauuluga ia te au, ia maua e le tatou itumalo le fiafia ma le filemu.

Lau Afioga i le Fofoga Fetalai, ia faamanuia le Atua i le faatautaiga o le Fonotaga ma le Fonousu a le atunuu, faamanuia le Atua i lau Afioga. Ia faamanuia le Atua i le Afioga i le Palemia ma le tatou Malo, o a outou Afioga i Minisita o le Kapeneta, le Taitai o le Itu Agai ma le mamalu o lenei Maota, aemaise Ofisa Sili o Pulega ma Pule Sili o Matagaluega ma Faalapotopotoga a le Malo, ia faamanuia le Atua i a outou galuega ma tiute.

Soifua ma ia manuia.

**FOFOGA FETALAI:** Malo saunoa, faafetai fetalai i le sui usufono mamalu mo Faasaleleaga Nu.4, e pei lava o upu e fai i le itumalo, ua lauiula ae pou i toa le fale nai Amoa. Malo faafetai mo le saunoaga matagofie. Ia, o lo o faagasolo pea le tatou Maota.

O lea ua ou maitau atu ua toeitiiti uma nisi o sui usufono ona tuu atu lea o le avanoa i le tatou Komiti, ona faaiu lea i le Afioga i le Taitai o le Itu Agai ona tali ai lea o le tatou Malo. Ou te manatu lava a tatou faamalolosi, e uma lava i le aso.

Ua avanoa le Maota mo se sui usufono e fia saunoa. Ia, tulai maia se tasi o sui usufono mo Gagaifomauga Nu. 1, tulai maia e faaiu maia lena tala na atoa o le tatou Maota nei.

Tulai maia le sui usufono mo Gagaifomauga Nu.1 e saunoa.

**Tofa FAIMALOTOA KIKA IEMAIMA STOWERS (Gagaifomauga Nu.1):** Lau Afioga i le Fofoga Fetalai, avea ia lenei avanoa e toe faatalofa atu ai foi i lau Afioga, e faapena foi ona faatalofa ma faatulou i le paia o le tapuaiga a Samoa i lau Afioga i le Palemia ma le Sui Palemia, le paia mauuluga i Minisita uma o le Aiga Kapeneta, ae le gata i lea o a outou Afioga foi i Minisita Lagolago. E faatalofa atu foi i lau Afioga i le Taitai o le Itu Agai faapea foi le paia lasilasi o le Maota Fono i sui usufono, o tootoouli o le atunuu i totonu o le Palemene. E faatalofa atu foi i le afifio o tupu ma ee, o tamalii ma failauga, o le paia lava lea aua aao o le tatou Malo i Ofisa Sili o Pulega ma Pule Sili o Matagaluega ma Faalapotopotoga o lo o tautua ma le fita i le tautuaina o le tatou atunuu i vaega eseese o lo o outou galulue ai.

E le gata i lea e faatalofa foi i le au faasalalau, o leitio, o nusipepa, o TV, o i latou o lo o molimoli atu i maota ma laoa le Fonotaga a le Palemene aua le

maimoa ma le faafogafoga tapuai mai a si o tatou atunuu pele o Samoa. E faatulou foi ma faatalofa i le tapuaiga a Lana Afioga Mamalu, O Le Ao o le Malo ma lana Masiofo, le Sui o le Fono a Sui Tofia ma le Masiofo. O le paia lava lea aua Tama ma Aiga, o Aiga ma Tama, o le mamalu ia Pule ma Tumua, Ituau ma Alataua, Aiga i le Tai ma le Vaa o Fonoti. Tainane foi le faafogafoga mai a Amerika Samoa i le paia ia Sua ma le Vaifanua, Fofa ma Aitulagi, Saole ma Saleaamua ma le Launiu na Saelua, le Laau na Amotasi ma Auvaa o Tootoo ma upu i le Manuatele. E le faagaloina le tapuaiga leleoa a Feoi o le Talalelei i le ituvai paia o Auauna a le Atua i Ekalesia e fia o lo o tauasu le Ipuvai o le Ola aua se manuia o Samoa e le gata i la le tino, ae faapea i lona soifua faaleagaga.

Lau Afioga i le Fofoga Fetalai o lea ou te manatua lelei o le aso 21 Ianuari o lenei tausaga 2015 sa ou tulai ai mo le lauga mua po o le lauga faataupou mo si ou itumalo mo le faaauauina o lenei taimi puupuu o totoe o lenei Paeaiga. O lea ua lima nei masina talu ai, ae o lea ua ou toe tulai atu mo lenei lauga mulimuli. Ia o se sao foi o lenei itumalo aua le Tala o le Tupe ua lauiliuina nei e faaauau ai galuega a lo tatou Malo i se isi Paeaiga fou o le a tulai mai i le tuanai ai o le faiga filifiliga ma le faiga palota i le tausaga fou.

O lea ua ou manatu ai lau Afioga, sa ou faapea e faamulimuli lou itumalo, ae ua ou manatu se i faamuamua atu i si ou itumalo o latou sa limatusi ma faapena ona latou filifilia lou nei tagata faatauvaa e fai ma o latou sui e taumolimoli lo latou sao i luma o le Maota o Samoa i la latou tapuaiga. Ia e faapitoaugafa ma muai momoli le faafetai tele a lou nei sui usufono i le faafogafoga mai a si ou itumalo i le Aufaigaluega Paia o lo o faafalelemalu ma faafaletulua aua le tauasuina o le Vai o le Ola ma nonomanu aua se manuia o Samoa mo a taeao.

Faafetai i lau Susuga i le Toeaina lau Susuga Tanielu ma le faletua, faapea foi le Susuga i le alii Sea, lau Susuga Tifi ma le faletua. Malo i le tapuaiga a lau Afioga i le Ositaulaga Patele Jerry Sialao, lau Susuga i le Faafeagaiga Folatasi ma le faletua.

E faapea foi lau Susuga i le Epikopo Pakau ma le faletua, aemaise foi o le faafogafoga mai a lau Susuga Filipino ma le faletua i le Ekalesia i Manase. Faafetai i le tautai potu, malo tatalo, faafetai mo faamanuiaga.

E le faagaloina foi le tapuaiga ma le nofo tatalo a Taulaga Tagata uma o le tatou itumalo o lo o faapena ona tautua i Ekalesia e fia e le gata i Samoa nei ae faapena foi i atunuu i fafo. Malo tatalo aua se manuia mo le tatou itumalo. E faapena foi si toeaina o lenei itumalo, le Afioga i le Taitaifono o le Ekalesia Soofaatasi lau Susuga Kasiano Leaupepe, malo fai o le faiva, malo tapuai, malo tatalo.

E momoli atu foi le faamalo ma le faafetai i le faafogafoga tapuai mai a le tatou itumalo pele ia Safotu ma Manase. O paia lava ia aua le afifio o Sao e Fa, le Aiga Sa Umalau, Leatipouniu ma le Faasau, le alaatai o lau Fetalai i le Tulafale lau Fetalai Lavea, o le Alii o le Itu na e mua i malae e tausi vaatele aua le tupua i Finao, le Susu o Taito ma le Aiga Sa Umalau ma le Fetalai ia Tauasa.

Faafetai foi ma faamalo i le tapuaiga a faletua ma tausi, o saoa ma tamaitai, aemaise foi aumaga ma le malosi o si o tatou itumalo. Ia e faapena foi ona molimoli le faafetai i le paia maualuga o si o matou itumalo o lo o alaala ma papaaao i Apia nei, mai mauga tetele seia oo i e aupito iti, e le gata o aoga a nai fanau, ae faapea foi galuega ma feau o lo o maua ai nai seleni e tautua atu



ai nai o tatou aiga i Savaii i le itumalo, ae faapea foi le galuega a Ekalesia e fia o lo o tautua ai ma tapuai ai. Ia tapuai maia ae se i taumafai atu se sao o si o tatou itumalo i le Tala o le Tupe o lea ua faataatia nei i le Maota.

E muamua lava ona momoli le agaga o le faafetai tele i lau Afioga i le Minisita o Tupe, le Afioga lava lea i le Palemia, le Ofisa Sili o Pulega lau Fetalai Lavea, le Matagaluega ma le Pulega a le Matagaluega o Tupe i le galuega fita i le tuufaatasia o le Tala o le Tupe, e le o se mea faigofie. Faafetai tele foi i lau Afioga i le Taitaifono o le Komiti lau Susuga Papaliitele ma le mamalu o le Komiti sa latou toe lauiluina ma toe iloilo lenei Tala o le Tupe ua maua ai se malamalamaaga ma se faapupulaga atili o sui usufono o lenei Maota e tusa ai ma le Lipoti malamalama ua tuuina mai mo le tausaga faaletupe e faaiuina i le aso 30 Iuni 2016.

Lau Afioga i le Fofoga Fetalai, ia o le Tala o le Tupe ua faapena ona faauigaina ma faapuina i se gagana faigofie, e fua o tatou manao i le mea e gafatia e le Malo, e momoli ai le loto faafetai tele ma le faamalo i lenei fuafuaga fetuutuunai ma le loloto o le tofa, e pei lava ona malie i se tasi o faaupuga, ia o le uta lava a le poto o le fetalai, ae o le uta a le vale, se i tulou lou gutu ma le afi, ia e tamau. E faapena foi ona tatou manatua le tasi upu, ia o le fuata ma lona lou, o le taimi ma mea e tutupu ai, e pei lava o se faataitaiga i lou nei sui usufono vaivai, o Tulafono o le Maota o lo o faapena ona tatou galulue ai i Komiti eseese o le Malo o lea Matagaluega ma lea Matagaluega, e galulue, pasia, pe fa i le ono masina toe tuu mai i totonu ma toe iloilo, aisea?

Ia aua lava e le mafai ona tamau i se mea ua i ai, e sailiili atili ma autilotilo i le mea aupito sili aua le lumanai o le tatou atunuu ma le mea e tataua ona faia i lea taimi ma lea taimi. Ma o le Tala la o le Tupe lau Afioga i le Fofoga Fetalai e le tele se tala e na o le agaga faafetai, ou te faafetai muamua ona o lea ou te mautinoa, faafetai lava mo galuega isi ou itumalo, o lea ua ou mautinoa i le Tala o le Tupe lenei, o lea ua i ai i totonu le seleni mo le auala o lou itumalo i le pitonuu i luma o Safotu, o lea e faafesagai ma le auala lea e alu i le vai lea o Safee e fesootai ai ma Paia i le alu lea i uta o le auala lea.

Lau Afioga i le Minisita mo Galuega, Felauaiga ma Atinae Eseese, e avea lou sui usufono e momoli atu le agaga faafetai tele ma le faamalo o lo o faafofoga mai lou itumalo, e faapena ona faamalo i lau Afioga. E faapea foi le Ofisa Sili o Pulega ma le Pulega o Vaa a Samoa, lau Afioga, se ua aulelei ma matagofie le uafu i Mulifanua - ma ou te talitonu, ma ua vaaia foi le amata faagasolo atu o galuega o le uafu i Salelologa. Na saunoa foi lau Afioga i le Minisita i le aso ananafi, o lo o i ai nai faafitauli o lo o ponaia ai ma faatuai ai le uafu lea i le uafu i Salelologa a maea ona foia, ia ua faapena foi ona sili atu ona aulelei le uafu o le a i ai i Salelologa, faafetai lava i le Ofisa o Vaa a Samoa, faamalo le tautua ua manaia tele le tausiga o vaa ua mama mea uma o lo o i ai i totonu o faleui, se i tulou, e faapena se agaga na o le loto faafetai.

Faafetai mo galuega e tele o le tele o sui usufono o lo o faapena ona tutulai atu ma faapena ona le iloa e lau Afioga i lea taimi ma lea taimi pe o le a faapefea ona faasoa mai o matou manaoga i o matou itumalo, ae malo le galue, malo le faatoatoa, faafetai le tali manao.

Faafetai i lau Afioga i le Palemia, ua e saunoa malamalama lava i le aso ananafi, o lea ou te iloa e toa 20 ma ona tupu ia sui usufono mai Savaii, ae faafetai ua e saunoa, e le o toe mamao ae amatalia galuega mo le vai lea le Maliolio, malo faafetai i le Malo, faafetai tele lava, e pei lava ona saunoa lau

Afioga e lua lava vaega o lo o faagasolo ai galuega a le Malo, o galuega patino mo itumalo, ia e faapea ia galuega a le Malo i ona tulaga aoatetele mo le manuia lautele o le atunuu. E talitonu lenei sui usufono e le o faapito manu ia Tasi, ua saunoa foi le Afioga i le Minisita o lo o faaauau pea Matagaluega, ua malamalama ma manino le folasaga, e ala ona tuai ona o le leai o ni tupe o lo o tausailia ni seleni. Faafetai i lau Afioga ona o le tele o galuega tetele ua faasopolia ai Upolu ma Savaii, o lo o i ai foi sui usufono o lo o saunoa i nisi o mea o lo o fia faaleleia, ia tapuai, pei o le tapuaiga a lou itumalo, e le tagisa, ae faapena ona tapuai ma tatalo ua i ai i totonu o faamaumauga - ma e a umi, o le mafuaaga lena e ala ai ona umi o lo o tau faasoasoa tupe a lo tatou Malo, faafetai tele. Faafetai i Afioga i Minisita malo le galulue, faafetai tautua.

Ona oo mai lea o se faamatalaga, faafetai i le Minisita mo Aoga, Taaloga ma Aganuu, faafetai tele mo fuafuaga uma mo le manuia o aoaoga a alo ma fanau o le atunuu, e le o faapito i se vaega ua manino lau folasaga e amata mai lava i aoga amata ma faasolosolo se i pai lava i le faatumutumuga o aoaoga.

O faataatiaga ma fuafuaga ma polokalame ua faataatitia ma ua faagasolo, malo le tautua, ae faafetai tele lava i lau Afioga e pei ona ou faafetai atu foi i lau lauga mua ia Ianuari, faafetai tele lava, ou te talitonu, o lenei foi Tala o le Tupe, e ui ina puupuu le taimi ua ta tuitui atu ma ou augani atu i a outou Afioga i Minisita, ae ou te talitonu o lau saunoaga o lo o faafogafoga mai lou itumalo ma le agaga faafetai ma le agaga fiafia, e aumai lau faamuamua i le malae taalo o lou itumalo, ua leva ona taliga, faafetai tele i lau Afioga, faamanuia le Atua i le soifua laulelei, e tele galuega o lo o faapena ona feagai ma le aiga Kapeneta, e momoli atu le faafetai i Afioga i Minisita uma o le Kapeneta, se ua malo le galulue, aua e fai lau tala ua sui le faalogo, a ta faalogologo atu i tala a tagata aemaise foi o le o i Savaii ma omai e oo lava i luga o vaa, aemaise lava tagata foi nei ua tai lima tausaga ua malaga i fafo ma nonofo ai e asiasi mai i maliu ma faalavelave ma mea faapena, se ua ofo, i lau lava faalogologo ua sui le faalogo, ua talanoa tagata ua siitia le atinae o lo tatou atunuu, ua sui le vaai na o e leai ni mea tetele faapea, ae ua omai ua sui le vaai. O vaega eseese sa le i i ai muamua, a o lea ua foi mai o lau faalogo i le tele o tagata i lau faalogologo i ai ia au lava ia, ia ua toe fia foi mai nisi, ua toe fia foi mai isi o tatou atunuu, aisea? Aua foi e le o malolo lo tatou atunuu aemaise lenei Maota mamalu i le Malo faapea foi lenei itu e finafinau i taimi uma i galuega lelei ma atinae, aua le manuia lautele o le tatou atunuu.

O le Minisita mo le Soifua Maloloina, faafetai tele, ua manaia tele le feilafi le tatou falemai ma mea uma ua faapena ona autovaa mai i ai e ua puapuaga i le tino mo togafitiga, faafetai tele mo galuega lelei, malo mo mea uma, ae fai atu pea ma faaoo atu i ou luma le agaga faafetai tele a lou nei sui usufono, ae ou te le i sau i totonu o lenei Palemene, e le mafai ona galo lou sulu atu i lau Afioga ona o mafatiaga o se tasi o le fanau, ua vaai atu lava ua leai se faamoemoe, faafetai i lou tali manao, malo lou alofa i le atunuu, aemaise o alo ma fanau e pei ona pele ia te outou lo outou mamalu o matua o pelega o alo ma fanau, faafetai tele e le galo lou alofa ma lou agalelei. Ou te talitonu lava i le manaia o fuafuaga ua faataatitia ma le manaia o tatou falemai, ae pei foi ona taumafai mai le.....E i ai lava nai mea laitiiti o lo o faapena ona ponaia ai le tautua a le Matagaluega, ae o lau fautuaga i le mamalu o le atunuu e le tau tulituliaupu e faalauiloa atu, i lau maitau i ai ma le mea na ou

tilotilo i ai ma mautinoa, a lea e i ai le Faauluuluga o le Matagaluega e tuumumusu i ai pe a faapea o le a sau vaai i totonu o le falemai. O lo o afio le Afioga i le Minisita e tali manao i le atunuu, e faailoa i ai ni mea o faaletonu pe a ua tuai pe faaletonu foi le auunaga i lea taimi ma lea taimi, ou te talitonu lava au ia o le tulaga lea. O lea foi ua ou talitonu ina ua ou oo mai i totonu o le Palemene, ua loa foi tausaga o ou faalogologo mai i le faamatalaga atoa lea, o lea ua ou talitonu nei, e le o lou sau ou te lauga ma ou leotele i totonu i i, ae o lau molimau, e ese le faigofie o nai toeaia, se i tulou o outou paia ma o outou mamalu.

Faafetai lava i Afioga i Minisita uma ua ou tuitui i o outou faitotoa na outou tali lelei mai, ia e sao ai lava le upu, o le alu i lalo e maua ai le ai ma le manumalo, faafetai tele, faafetai i mea ua faapena ona faataatia mai i le Tala o le Tupe o le a faamanuiaina ai lenei itumalo, e ui ona ua leva ona taatitia talosaga, o le upu a le atunuu, e tuai lava ae fai, faafetai.

O le Minisita mo Punaoa Faanatura ma le Siosiomaga, malo faafetai i le tele o galuega, o se Matagaluega tele, faafetai faamalo le tautua, aemaise foi o le susuga i le alii Pule ma le mamalu o le Matagaluega o lo o faapena ona feoai solo ma faapena ona sailiili manuia aua le faaleleia atili o mea uma e aafia ai le siosiomaga matagofie o Samoa. Ua faafetai o lea ua amata ona i ai sina taligalu lea ua i i le va o Manase ma Safotu, ua matua vaitiiti lava le va i ina ua tau le ofi ai taavale i le tolotolo lea, faafetai mo lea foi galuega lelei ua faia aemaise o lea ua vaai ua toe faalatele atu le ala lea mo le savavali o le mamalu o lou itumalo, aemaise o le tele o tagata tafafao maimoa mai, o lea lava itumalo, oka le tele o tagata tafafao asiasi maimoa mai, faafetai mo ia galuega lelei, ae ou te le toe fia taua le tele o mea ia na ou taua i lau lauga mua ua leva ona faataatitia, ae ou te talitonu e faapena lava ona oo i ai, ae o na o sina mea lava lea, ua tau popolevale le manatu, aemaise lava o le aia tele o i i Manase, ua alu isi faleoo o le vaega o tagata asiasi maimoa mai, na ou savali talu ai nei ma ou faasolosolo atu ai, e le gata i lea o lou itumalo, e tuafale lava i le sami, a i ai se isi tulaga e osofaia i se Tsunami, ia e mafai ona me'i tagata i tua ua leai ma se aualatele ona ua lalata tele mai le....na ona tuutuu atu, faafetai e le i maua atu sou avanoa, na ou alu atu ae ua pisi tele lau Afioga ae ua talanoa ma le Faatonusili, faafetai le galulue, o lea ua faailoa mai ua ou tilotilo foi, o lea ua i ai le igoa o lou itumalo i le faagasologa o a outou galuega faataatitia ma le sailiga o le tupe e mafai ai ona faatino ia galuega mo lo matou itumalo.

O le Minisita mo Leoleo ma Falepuipui, malo, ua ta faalogo ma o ta vaai foi, ua tala fiafia mai foi tagata ua tele le suiga i le Matagaluega i lenei foi vaitaimi aemaise foi o le tulai mai o le Komesina fou o le Matagaluega, malo le galulue.

Lau Afioga i le Minisita mo Faatoaga ma Faigafaiva, faafetai. E faapena se lagona i le tele foi o el vaai ma le faalogo i mea ua faatupulaia i a tatou oloa e auina atu i fafo i mea tau faatoaga ma tulaga uma faapena, faamalo galulue.

Lau Afioga i le Palemia, le Sui Palemia aemaise foi o le Minisita mo Pisinisi ma Alamanuia, lau Susuga Tuiloma o lo o faafoeina Tupe Maua ma mea a le tatou Malo, malo saili, malo le taumafai e saili mai tupe e tali ai manao o i matou nei i lenei Maota o lo o faapena ona aumai i matou o latou sui usufono o lo o augani atu ma tatalo atu ma tuitui atu, faafetai e le o se mea faigofie le tausailiga mai o ni tupe aua e le maua uma ni tupe e fai ai mea i totonu o le tatou atunuu, faafetai tele. E faapena foi lau faafetai i le tama Minisita o si a

matou foi Matagaluega i atinae o lo o faapena ona fuafua, tau ina faamanuia le Atua.

Afai ae oo lea ua lata mai le taimi po o lea tausaga pe a ae faataatia le submarine cable lea e fesootai atu iinei, Fiti, Ausetalia, kami atu lava i ina tau i Amerika, e fesootai ai Samoa i vaega uma o le lalolagi i le sailiga vavave o auala televavave e fesootai ai i vaega eseese o lo o moomia. E pei foi lava ona malie i le saunoaga a Peseta, ma e faafetaia ai lava lenei itumalo, e faaataata a lafoga foi i nisi taimi, afai e lelei mo Apia, e lelei foi mo Savaii. Faafetai tele e le o faapena ona fai faapito i Upolu nei, ua vaaia ma matou molimauina e matou sui usufono mai Salafai, o lo o faasosolo atu pea galuega a le tatou Malo agai i le matou itumalo vaivai i Savaii. Faamalo faafetai, lea foi pei ona taua e Peseta, e le gata ai la i le lelei mo Apia manaia mo Savaii, manaia mo atunuu i fafo, ia faapena ona piipii atu foi i ai ma Samoa. Faafetai tele malo le galulue i a outou Afioga i Minisita o le Kapeneta, Ofisa Sili o Pulega ma Pule Sili o Matagaluega ma Faalapotopotoga, malo fai o le faiva, ua agiagi i luga Samoa.

Ou te lagolagoina le saunoaga a le Afioga i le sui usufono mo Faasaleleaga Nu.2 le na muamua ta i le tatou mataupu lenei i le Tala o le Tupe i le Aso Tofi o le vaiaso talu ai. Ona maea lea o le ti ou fai atu i ai, ou te faaluaina lau lafo, e ui lava ina i ai tulaga foi e saunoa mai ai lea itu o le Maota, faafetai lava ia Papalii o lea ua ia faatu mai e matua fai se loan lapoa ma tele, ia faapena ona fai uma ai mea o lo o moomia e tatou itumalo. Faafetai Papalii o lea foi na saunoa i ai Taefu i le aso ananafi, o le agaga lena. A o le fia teuteuina o lea lafo, ae a pe a faamuamua mai Savaii aua o lea ua feilafi Apia ae avatu ia e faafeilafi mai ai Savaii. Na o ni nai manatu e avatu, ae lafo atu ma manaoga faivavale, ae pei lava ona saunoa le Afioga i le Palemia, e pule lava le Malo, pe fai pe le faia, e pule lava le Malo. Faafetai i le Malo, o la outou pule lea ma la outou faaaloalo i le mamalu o itumalo uma o le tatou atunuu.

**FOFOGA FETALAI:** Malie le sui usufono o lo o saunoa, se i tulai mai le sui usufono mo Faasaleleaga Nu.2.

**Susuga Papalii Lio Faavaivaiomanu Taeu Masipau:** Faafetai lava i lau Afioga i le Fofoga Fetalai, malo foi faafetai i le sui usufono mamalu, se i fai foi sina malologa a le sui usufono mamalu, ae ona o lea ua taua lou igoa, e leai, o le nonogatupe lea e \$100+miliona mo se tatou malae vaalele, e le o nisi lava galuega. A maua lava se tatou malae vaalele mo le motu i Salafai, ua lava lea ona aoga lelei lava lea i tagata tafafao maimoa mai mo le tatou itumalo.

Ma lou faaaloalo.

**FOFOGA FETALAI:** O le lafo toe teuteu lea na saunoa mai ai Faimalotoa.

**Tofa FAIMALOTOA KIKA IEMAIMA STOWERS:** E pei o le agaga lena lau Afioga i le Fofoga Fetalai. O lou fiafia ia ina ua saunoa le Afioga i le sui usufono i lea foi Itu, fai se loan lapoa, malae vaalele, uafu, mea uma lava mo Samoa atoa, a o lea ua toe teuteu atu, ia faalapoia atili le tatou loan se i fai

ai totonu o tatou itumalo. O lea e alo i galuega a itumalo, toe taliu mai i galuega tetele a le Malo, o se agaga lena, faafetai.

**Afioga Hon Palusalua Faapo II:** Lau Afioga i le Fofoga Fetalai, o se mea e fia faamalamalama i le saunoaga a le Afioga i le sui usufono o lo o saunoa.

**FOFOGA FETALAI:** Se ua pei lava oe o le teine foi lele e tau oleole o le leua ane lava o lea mea, matua maaleale tele lou finagalo. Se tuu ia le saunoaga.....

**Afioga Hon Palusalua Faapo II:** Se i fai se koma. Leai na ona faamanatu, ua faasa a tatou loan ua ova i le piliona le aitalafu. E pei o le mea lena o lea ou te tulai atu ai e faamanatu i le sui usufono, e faigata ua pulea mai tatou i fafo i a tatou aitalafu.

**FOFOGA FETALAI:** Ia o lea ua maua lou finagalo, ae o lea o le a avatu le faamalamalama.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, masalo tasi lea Taitai o se Itu Agai ua atoa le tolu vaiaso e le i faitau i le tatou Tala o le Tupe. Se i tilotilo i nonogatupe na e i ai lea e faamaea ai tatou le paleni lea na aumai e le tou Vaega. O lea ua tolu vaiaso o tuu atu le avanoa e te faitauina ai le Paketi, ae o lea e foliga mai lava e te le o malamalama.

**FOFOGA FETALAI:** Ia, o le ala lea na ou musu ai e tuu atu le avanoa, o lea o le a tauau ina atili ai ona maua le le malamalama. E pei lava o lena e sagatonu lau o le foi i saunoaga o lea e maua le avanoa, talosaga mai pea i le tatou nonogatupe lena.

**Afioga Hon Palusalua Faapo II:** Lau Afioga, o lea ou te faitauina le tusi lea i le itulau e 9 lau Afioga i le Palemia i le mea lea o le Fiscal Strategy Statement. O le tatou external debts lea e i ai, 2014/2015, ua.....

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le mea lea ou te fai atu ai, o lou tou manatu ua faasa ona toe nono mai e le Malo ni Tupe. Se soia e te lauga mai i mea tau tupe e te le malamalama i mea tau tupe.

**Afioga Hon Palusalua Faapo II:** Lau Afioga, oi a le malamalama o lea ou te vaavaai i le Lipoti? Na o le tagata e le iloa se mea.....

**FOFOGA FETALAI:** O lea o le a agai Palu ina le manino le tatou mataupu. O lea na e saunoa ia Faimalo ua fasa ae o lea ua faapea mai le Malo o tatou lava e pule, e leai se mea o faapea mai ua faasa. Na o le fautuaga le mea lea e aumai, a o lea lava e pule tatou ia tatou.

Tulai mai le sui usufono mo Gagaifomauga Nu. 1.

**Tofa FAIMALOTOA KIKA IEMAIMA STOWERS:** Faafetai lava i la Afioga i le Fofoga Fetalai, faafetai foi i le faauilavea a le Taitai o le Itu Agai.

E faamalulu atu ou te le o sela ou te le o fia koma foi. O lea e taumafai atu se motugaafa a lenei itumalo, aua po o ai lava le sui usufono e faalavelave mai, o lena sa ou fai atu i lau lauga mua, ou te le i sau ou te tali i ni fesili ma ni tali, na ou sau e molimolilo le finagalo ma se sao o lou itumalo ae le afaina. O le tali lena, o lea ua saunoa le Palemia na ou tau tali atu ai, ou te le i vaai lava na ou faitau uma i le Tala o le Tupe lea na aumai, e le o i ai lava ma se mea o tau mai ai o lo o i ai se faasaina o le tatou Malo e toe nono mai ai ni tupe. A o lea foi na saunoa ananafi le Afioga i le Palemia, fai, a manao e fai fai, o lea e mafai e le Malo ona fai. Ia o lena le fautuaga, ia saga aumai se nogatupe tele. A uma lava ona fai lelei... a uma lava ona fai mea o moomia e itumalo, ailoga a toe tatalo ni sui usufono aua o le a felesi manaia auala ma mea uma? Ia, ae....

**Afioga Toeolesulusulu Cedric Pose Salesa Schuster:** Lau Afioga i le Fofoga Fetalai...

**FOFOGA FETALAI:** Malie lava le sui usufono o lo o saunoa, se i avatu le avanoa i le faauilavea a le sui usufono mo Aana Alofi Nu.1. Toeolesulusulu o se mea tau siosiomaga lea e te tulai mai ai?

**Afioga Toeolesulusulu Cedric Pose Salesa Schuster:** Lau Afioga i le Fofoga Fetalai, e leai, o le fesili e fia malamalama e tusa ai o le saunoaga a le sui usufono i le vaega lea o nogatupe. Po o silafia e le Afioga i le Tamaitai sui usufono e maitau atu i le Tala o le Tupe o lo o aumai, atonu o le \$20miliona i le \$30miliona le isi vaegatupe o lea atonu e amata i le tausaga fou o lea e le i totogiina i nonogatupe ua uma ona aumai, e 14 loans lea e i ai a le tatou atunuu mai le 70+ o loans, lea e le i totogiina, pe tusa ma le \$20miliona.....

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, ua alu le taeao o tau fesili? O la e manaia lava le saunoaga, fai pea lau saunoaga o lea ou te faalogologo.

**Tofa Aveau Tuala Lepale Niko Palamo:** Lau Afioga i le Fofoga Fetalai, pe maua se avanoa, na o se mea e fia faamalamalama. O le autu o le Tala o le Tupe pei ona saunoa i ai le toatele o sui usufono, e fua le peleue i le tele o le ie. A o le mea lea ua ou vaai atu ai, o lea o le a fua le peleue i le tele o le aitalafu. Ma le faaaloalo lava.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le mea lena o lea e tupu nei, manatua o le ie lea e talanoa i ai, o le vaega e maua mai ai tatou tupe maua, o le vaega e maua mai tatou foai, ma le vaega o nogatupe. O le ie la e lautele e tolu vaega. O lona uiga, e fua i ai i le ie lena. O le mea lea o lea e tupu, o le tolu o vaiaso na ave ai le Tala o le Tupe i le Itu Agai, a o lea e tutu solo mai e le malamalama i faaupuga.

**FOFOGA FETALAI:** Ia, Faimalotoa, ia tulai mai e faaauau le saunoaga.

**Tofa FAIMALOTOA KIKA IEMAIMA STOWERS:** Faafetai lava i lau Afioga i le Fofoga Fetalai. E le umi foi se manatu. E faamalulu atu foi i sui usufono o lo o tutulai mai, o le latou lava lea faauigaina ma le latou maitau i le Tala o le Tupe, a o lau lava lea manatu ma lou faauigaina o le Tala o le Tupe. Ae afai foi e a, ia o la e le o fia fai auala la le Taitai o le Itu Agai, ia aua la ne i faia auala o le Taitai o le Itu Agai pe afai o le tulaga lea.

A o le taumafai atu o matou nei sui usufono o lo o naunau atu mo le fia faaleleia o mea i totonu o matou itumalo ma le atinae o si o tatou atunuu i tulaga tetele, ia o se manatu lena. Out e le o tilotilo foi i ni aitalafu ma ni a, o le uiga foi o le fua o le... ia e fua i le mea e gafatia e le Malo ma toe nono mai. O le tulaga lena aua o la e ua uma ona saunoa mai o mea e mafai ona fai pe a manao e fai.

Ia, lau Afioga i le Fofoga Fetalai, ne it e i ua leoleoa lenei sui usufono fou, ae i ai lava le manatu se i maea uma lava sui usufono na mua i malae i totonu o le Maota ona saunoa, ia ona faatoa tulai atu ai lea o se manatu. Peitai ane ona o lea sa faapena ona tau saili se isi e tulai atu ae le i uma atu le tele o mea na ou mafaufau ou te lauga ai. Ae ui i lea, ou te manatu ua lava ma totoe ia tala ua ou fai atu e faapena ona fai ma sao i si ou itumalo o lo o naunau mai ma taputapu mai i faiva o le tatou nei Maota aua le manuia lautele o le tatou atunuu.

Ia ona faaii lea o se manatu, lau Afioga i le Fofoga Fetalai, o le a faapena ona seu i fanua se manatu o lenei itumalo. Lagi ia e mama ma faafualoa e le Atua le soifua tapuai mai o Lana Afioga Mamalu, O Le Ao o le Malo, le Afioga i le Sui Tofia ma le Masiifo, faapena ona alofagia e le Atua lau Afioga i le Fofoga Fetalai, lau Afioga i le Palemia ma le mamalu o le Aiga Kapeneta, e faapena foi si au uo le Taitai o le Itu Agai faapea le Sui Taitai ma le mamalu o lea itu o le Maota.

E faapena i le tapuaiga a Samoa aoao aemaise le tapuaiga a lou itumalo pele o Gagaifomauga Nu.1, le faafofoga a Samoa ae ola lenei sui usufono faatauvaa.

Ma le agaga faaaloalo.

**FOFOGA FETALAI:** Malo fetalai ia te oe le Matua o le itumalo, i lau Tofa Lavea o le na mua i malae. E lala lava Salafai ae usoa. Masalo ua faafofoga ma le manino le Maota i lenei vaega o le aso.

Ia, o lea ua tatou taunuu mai i le saunoaga a se tasi o sui usufono fou o le tatou Maota ua tatou faatasi i le faaiiuga o lenei Paeaiga, le sui usufono mamalu i le afio aua le maualuga o lea itu i le tatou nuu i le fale Tuamasaga. Ia, tulai mai Seiuli Ueligitone Seiuli, ua avanoa le Maota mo le saunoaga faataupou i lenei vaega o le aso.

## LAUGA FAA-TAUPOU

**Susuga SEIULI UELIGITONE SEIULI (Sagaga le Usoga):** Faafetai i lau Afioga i le Fofoga Fetalai. Masalo o lea sa nofonofo lava lenei sui usufono fou i totonu o lenei Palemene ma mafaufau foi po o le a se taimi e oo mai ai foi i lou nei tagata se taimi e avatu ai sau lauga, ae faafetai mo le avanoa taua. Ou te mulimulitai lava i le upu foi lea a toeiina, “E fesili mulimai ia muamai. Faafetai o lea ua uma ona saunoa le tootoo na mavae atu

nei, faatoa ono masina talu ona tulai mai, ia o le a sosoo ia ma au aua o lea toe ono masina ona uma foi lea o au.

Lau Afioga i le Fofoga Fetalai o le Fono Aoaofaitulafono o le Malo Tutoatasi o Samoa ma le mamalu tele i sui usufono filifilia o le Palemene i le afio o lau Afioga i le Palemia o le Tama o le atunuu, le Sui Palemia faapea le paia ma le mamalu o Minisita o le Kapeneta, tainane le Vaega Faaupufai e Puipuia Aia Tatau a Tagata le HRPP. Tainane le afio o lau Afioga i le Taitai o le Itu Agai ma le Sui Taitai faapea le Vaega Faaupufai a le Tautua Samoa o lo o Agaia le Malo.

Ou te tulai i le agaga loto maualalo i le faaaloalo tele e tatau ai e fia faaogaina lenei laolao matagofie mo lou uluai avanoa i totonu o le Maota o le atunuu, se i taumafai atua ai se leo o le itumalo o Sagaga le Usoga. E le taufaafuluina le pa e aina ma le lautifa e osofia i le paia o le Maota, pe la ea o sau upu o le a toe faaopopo ai pe toe suia ai se iota se tasi o sa ma faiga o le Maota o le atunuu, o le Maota e tulutulu i tao ae ato i mamalu, e polapui i saunoaga ma fetalaiga, ma poupu i le faaaloalo ma le avafatafata. O le anofale ua mafatotoga ma malu paeaso, o le maota pogisa e teu ai le tofa i le auafamau ma moegalalo e sii i ai Samoa i ona upufai aua se manuia lautele o ona tagatanuu o lo o tapuai mai ma tui mai le mulipapaga.

Ou te le utuvaitofo i lo outou paia, aua e leai se poto po o se vave na te toe tolovae le upega i le loloto o le tai, tau lava ina ou faapitoamo le avega ma ou faapea atu ma le migao, nuunuu atu ia faatini o tausala i le paia ma le mamalu o le aufueloalo ma le aufaitau lauulu o le Maota, o e ua loa ona pale mai i le saofaiga a le Palemene o lo o i ai le tomai. E ta le liu o le vaa ae popoe, aua e fou le sui usufono i totonu o le Palemene. O lenei faatoa ofi faavaa i le ava lou sui usufono i le palota laitiiti ae o aga lava ia o le galugalu o peau o le masina faatali. Afai ou te taumafai atu i se upu ae le logomalie pe paopapa i lau faafofoga, ia outou vaatele mai, o le motugaafa na fili i le utiuti o lou taimi aua se sao o lenei itumalo. Afai e i ai se aoga, ia fatu ai le titi ma sui ai le ula. Ae afai ae le fausia, faamolemole ia vaivao le tofa faatupu ma se tofa faatamalii, o le galu e faatilafono ona pue. Faafetai ua malo afua, ailao ua maua lenei aso, malo le tautai. E moni ai le upu i le fetalaiga i le gataifale, e le tauanauina ia o le fau e soloa.

E le faagaloina i le agaga le tapuaiga a Lana Afioga Mamalu, O Le Ao o le Malo, lau Afioga Tui Atua Tupua Tamasese Efi ma lau Masiofo, faapea foi le Afioga i le Sui o le Fono a Sui Tofia, lau Afioga Tuimalealiifano Vaaletoa Sualauvi ma lau Masiofo. O le paia lava lea aua Tama ma o latou Aiga, o Aiga ma a latou Tama, le mamalu ia Pule ma Tumua, Ituau ma Alataua, Aiga i le Tai ma le Vaa o Fonoti.

Tainane foi le faafofoga tapuai mai a o tatou uso i le motu i Sasae, i le paia ia Sua ma le Vaifanua, Fofu ma Aitulagi, Saole ma Saleaumua ma le Launiu na Saelua, le Laau na Amotasi.....Auvaa o Tootoo ma upu i le Manuatele, e manuia faiva o le Palemene ona o lau tapuaiga, e pei o le patipati taoto a le Feepo.

Ou te faatalofa atu foi i le alofaiva ai o lau Afioga i le Failautusi o le Fono Aoaofaitulafono faapea le aufaigaluega a le Ofisa o le Fono, le tapuaiga i Faauluuluga o Matagaluga ma Faalapotopotoga Tumaoti a le Malo, le au faasalalau i leitio, o televise ma nusipepa, faafetai mo lo outou sao taua, faamalo le lagolagosua.



E fia faamauina le faafetai i le tapuaiga a le Aufaigaluega Paia a le Atua i Suli ma Feoi o le Talalelei o lo o faafale-le-malu ma faafaletuluia ai i totonu o lou itumalo ma Samoa atoa, faafetai mo le tauasuina o le Ipuvai o le Ola, aua se inumaga faale-Agaga o Samoa mo nei ma a taeao. Faamalo tatalo ua manuia ai le sailiga ipo nai Avalua o le filifiliga o le tagata faatauvaa ma le taualoa i le nofoa o le itumalo i le Palemene.

Lau Afioga i le Fofoga Fetalai, ina ne i ou laaloa, ae fia afea lou itumalo pele o Sagaga le Usoga, o lo o faafofoga tapuai mai aua e le galo lava Afiia isi ona vao. I le afifio o Saena ma le aiga Sa Saena, susu Luafetasaga o le Alo o Fuatino, afio Tuitea na tofia papa, ma lau fetalaiga Tupai, Lefale ma le afu o le Alataua, malo le tapuai manuia, malo le faatoatoa, o faiva e tapuaia o faiva ia e manuia, e iloa le manuula i ona lauvae, e leai foi se poto e na te iloa le taaligoligoa, vagana le Atua, ae faapea foi le afio o le aiga Sa Gauifaleai, lo oulua Fata ma Maulolo o Tuitui o le Gatoaitele, o vagana i tulafale ma upu ia te oe Tuisamau, faafetai mo le tapuaiga, e tatou te au i le tauola e au foi i le fagota, aua ne i faatoina faiva, o au nei a o oe taeao.

Malo le seu silasila, e lutia i Puava ae mapu i Fagalele. E le sese le upu, e lelei tamalii ma faleupolu e fetapai.

Ae faapea foi le tapuaiga i lou nuu o Malie, aua le susu o le Tapaau Faasisina i le Malietoa, e susu i lona nofoa vaevaeloloa ma lou fala na folaloa i lou tala na atoa, a malele, ua faafofoga Samoa, afio Maualaivao ma le Matua ia Faamausili, susu Seiuli o le ulu na taulata, susu Taito o le Foaialii ma le aiga Sa Maualaivao, le mamalu tele i pou e fitu o le maota o Malietoa ma lau fetalaiga Auimatagi, le upega fetalaiga i le lautinalaulelei, le Ala o Leului ma Salapo, ua faamalo le lagolago, faafetai le saili malo. Ia aua lava ne i ia i tatou le viiga, ae ia tuuina atu i le Alii le Atua, e ona Lona viiga. Ua malie pule i maga, ua malie le ua na to i le va, ua malie Sugalesele o lau pule lea ua tototetele, ua ou sapaia faatua eleele. O lau faaaloalo lea, ua ou tiu ai nei ma ou sapi ai i upufai o le Malo, se a ea le tagata faatauvaa ua e manatu ane ai?

Ou te fia faaaogaina foi lenei avanoa taua e momoli atu ai le faafetai tele i sui tauva sa tausinio mo le tofi o le nofoa o le Palemene, lau tofa Logo Fetaomi, lau susuga Vaotuuua ma lau fetalaiga Fata Tulasunui Talalelei, faafetai i le Atua ua tau muliai galu tau galu fefatiai, o lea ua lautasi le matagi ma lafo le malu, faafetai le tauva faatamalii ma le tausino faafaleupolu, ua se ata lautogi na laga tila, ae faapulou le tualima, ua faamalo le fai o le faiva, e iloa le tia e malie, e na ona fifimalie. Tatou faagalo fatia ua sola, tuli i luma so tatou ai, e le uma le fai aso o le Alii. E taaalo lava tama a o le uso, o Sagaga le Usoga e tasi, o outou o le uso ia te au, aua e sili le alofa o Keriso nai lo Lona ola.

Lau Afioga i le Fofoga Fetalai, e avea foi lenei avanoa taua ou te momoli atu ai le faafetai tele i le sui usufono o lenei itumalo sa tulai mai i lenei tofi mo tausaga e tele, le Afioga Muagututagata Peter Ah Him. E momoli lau faafetai tele i le Afioga sa tulai mai i le foe mo galuega uma na ia faia mo lenei itumalo, faafetai mo mea uma, afai foi o i ai ni galuega sa e talosagaina ai le Malo, ia aumaia lou faatuatuaga i lou nei tagata o le a ou taumafai i ai.

Ia lou itumalo e, tapuai maia, e le faatoina faiva aua e talitonu le taofi, o le sui usufono aupito lea ona saasaa i le taimi e galue ai i lenei Paeaiga a le Palemene. O a ni toe o Sagone, ae o a foi ni galuega o fia faaleleia mo le manuia lautele o lo tatou itumalo, o le a ou taumafai i le mea e gata mai ai le

mafai. Ae afai foi o le a le mafai ona faataunuaina ona o le puupuu o le taimi, aua ne i popona le toa i aai o finagalo, e aumai lava e le Atua le tamai mamoe e osi ai le taulaga.

Lou itumalo e, ou te le tatatuli pe ou te fafagu i lau pele, se i vagana ua ala lava ia, ua na o se tagi a le pumate i lou agaga loto maualalo, lou itumalo e o Sagaga le Usoga, o fea o i ai le tofa ma le faautaga, ua ta maoaluma, ua see lou vaa, o mata o masiasi e tatalo atu ai nei ma valuvalusia aa o le fau, pe tefa le tauala i sou finagalo faatamalii, ae to mai lau pule e faaauau ai lota taimi i le Palemene i le Palota Tele, e le i iloa sota lelei i le fanae o le tai papau, aua ua api le uli, se i vagana le fanae a le tai galu, faatoa iloa lea o se galuega e mafai.

E ui i lea, e le fai loto le nuu o manu, e logo foemuli i le nofoa, aua ne i faia sou loto, ae o lou finagalo. Ia manuia lou alo atu i le faiga filifiliga o le Faiga Palota Tele o lo o fou mai.

Lau Afioga i le Fofoga Fetalai, lau Afioga i le Palemia ma le mamalu o le Palemene, faafetai i lau tapuaiga a o alofaiva lenei itumalo i le Faiga Palota Laitiiti, ou te tatalo ina ia faaauau ona outou toe tatalo mo au i le Palota Tele.

Lau Afioga i le Fofoga Fetalai, e le faaitiitia le agaga fia faafetai i le Afioga i le Palemia ma le Kapeneta mamalu, i lou valaauina e tautua le atunuu i le Minisita Lagolago o le Matagaluega o Fesootaiga ma Faamatalaga Tekonolosi Faaneionapo, aemaise foi o le tofiga e sui usufono o le Komiti mo le Ofisa o le Palemene, ma le Komiti o Faafoega tau Pulega a le Malo. E le i manatu lava Asomua o le a sii lona fale i luga o le mauga, ae faafetai alofa, e leai se manatu o le a maua lenei faaeaea ona ua toe 6 masina ona faamuta lea o lenei Paeaiga, ae faafetai tele i lau Afioga i le Palemia i le manatu mai i le paupau o lou titi, a o lea ua oo i Lepea. Faafetai i le amanaia, ua mata e fia vaai le vaa o Inu, faamalo le faaeaea mo si ou itumalo, o lau pule lea.

Lau Afioga i le Fofoga Fetalai, avea lenei avanoa i lau lauga mua, e fia faaleo atu ai nisi o galuega atinae o lo o fia faaleleia i totonu o lou itumalo. Lau Afioga i le Palemia ma le mamalu o le Kapeneta, e le seluselu atu, ina ne i o tatou fao le viiga o le Atua, a o lo outou paia, o le faamatua o le magalafu, o afi tutu e atiafi i ai sui usufono o le Maota i mataupu ua mafatia ai o latou itumalo, e ui ina moe i le ala le aumoega nai le Alataua ma ua foliga ua tautuaupega le ulufale mai i le Maota, faapei o le taliu mai o Apaula ua liu mauga Vaea, ae e le mate le faamoemoe i le moe ai o Vaatausili i le Ana, atonu e moe, moe, moe, ala mai ua atoa lona tino e faataunuu ai nai moomooga faivavale ua tagisa atu ai le itumalo o Sagaga le Usoga.

Lau Afioga i le Fofoga Fetalai, e talosagaina le mamalu o le Malo i le auala lea o si ou nuu i Tuanai, o le auala lea o le auala ua uma ona fausia, o le auala lea mo le silafia e le mamalu o lenei Palemene, o le auala lea e alu i le malae vaalele ona alu atu lea tau atu i le auala o le alaalafaga lea o Leauvaa, ia ona faaauau ai lea seia taunuu atu i le auala lea faalava i Aleisa, o le auala lea e le gata i le faaaogaina e lou nuu o Tuanai, a o lo o faaaogaina foi e le mamalu o le atunuu e femalagaai mai Aleisa i le auala lea agai atu i le malae vaalele, o le auala ua uma ona fai, masalo ona ua faaleagaina foi e tafega, ia na o se toe faata lava, masalo pe na o se \$150 e alu ai. E faapea foi le auala lea i Afega, o le auala lea e tutusa lava ma le auala lea i Tuanai, o le auala lea e alu atu i le malae vaalele ia alu atu ona tau atu lea i le auala faalava lea i Aleisa, e le gata foi isi ou nuu i Afega, ia a o lo o femalagaai ai foi le mamalu ma le paia o le atunuu, o e o lo o fia malaga mai i Aleisa i le auala lea e alu i le malae

vaalele, e faapena foi ia nisi o le mamalu o le atunuu o lo o fia malaga atu i le auala lea i uta foi. Ua leaga foi nisi mea o le auala lenei ona ua faaleagaina foi i tafega, ia ae toe lava ina faata le auala lenei, aemaise le faafofogaaga a lenei Palemene, o le auala lea o lo o i ai o lo o fausia ai le faleaoga fou lea o lou itumalo le kolisi le auala lea o lea o lo o fausia nei le faleaoga fou lea, ia o le auala foi lea e alu atu ona tau ai lea i le faleaoga lea o lou itumalo.

Pe o le a se finagalo o le Afioga i le Palemia ma le mamalu o le Kapeneta mo le faaleleiga o lea auala, aemaise foi o le auala lea i lou nuu o Afega le auala lea e taamilo atu i le pito i tai, le auala lea e taamilo atu i le isi itu i le mea lea i le auala laupapa lea i Afega toe alu ifo tau i tafatafa o le maketi, ua faaleagaina foi lenei auala ona o nisi o tafega ma timuga, pe mafai lava ona toe silasila i ai ma toe fia faata lenei auala, ailoga lava e tele se tupe pe na o se \$150,000 e toe faata ai faamolemole.

E faapea foi i le auala o si ou nuu i Malie, le auala lea o Vailoa ma Vaifoa, e le mamao tele lava auala ia e lua e mafai ona o atu ona fesootai lea o auala ia, e le iloa pe na o se tai kilomita ma le afa o auala nei, e moomia lava le toe faaleleia aua nisi o nuu foi o lo o nonofo ai foi ma aumau ai i auala ia i Malie.

Lau Afioga i le Fofoga Fetalai, o se ai ma se oso lelei lea o lenei sui usufono fou pe a talia le manaoga o Sagaga le Usoga. Ma e le taumateina faameataitai i le ato le faapea mai o le itumalo, "Seiuli, faafetai mo tatou auala, o ou mama na ae le palotaina le tatou tofi i le 2016."

Lau Afioga i le Fofoga Fetalai ma le mamalu o le Palemene, ua lava lea lauga, ae atonu e toe maua nisi manatu i se taimi o i luma. A o se manatu i le Tala Faatatau o le Tupe ua i luma o le Laulau a Fono, e avatu le faafetai i lau Afioga i le Minisita o Tupe po o le Afioga i le Palemia, faafetai mo le galuega fita e le faigofie, aua e fai foi o le silasila i le lauamanu, ae ao foi ona mataitu le faamuli o atu. E tautalaaso le sao tamaitai o le Vaaimalae, tau ma lau Afioga i le tau faasoasoina o le tamaoaiga o le atunuu. Aua ne i faoa i le ta lou finagalo i se talosaga soonafai a ia taofi i iumaea. Faamalo i le Ofisa Sili o Pulega ma le Matagaluega o Tupe, malo le galulue, ma e matua lagolagoina e lenei itumalo le Tala Faatatau o Tupe ua soalaupule nei i luma o le Maota.

Lau Afioga i le Fofoga Fetalai, o le a seu i fanua le sa o lenei itumalo, e ui ina naunau i le avanoa faaauro ua tuuina mai mo lenei sui usufono, ae manao i le ufi ae fefe i le papa, o si ota lima foi e toe paia ai si ota mata. Ia lagi e mama ma ia faafualoa e le Atua le soifua o Lana Afioga Mamalu, O Le Ao o le Malo ma lana Masiofo, ni ao gasolosolo aua le tapuaiga i le Sui o le Fono a Sui Tofia ma le Masiofo, lagimama lau Afioga i le Fofoga Fetalai i le Maota. Ia faamanuia le Palemia ma le Sui Palemia ma le aiga Kapeneta, ae faapea foi le Taitai ma le Sui Taitai o Itu Agai ma sui usufono uma lava o le Palemene.

Ia manuia le tapuaiga a si ou itumalo o Sagaga le Usoga aemaise o lau faafofoga Samoa, ae ou ola i le alofa ma le agalelei o le Atua. Faafetai.

*Na faaalua le fiafia o sui usufono o le Palemene i le patipati o latou aao i le maea ai o le Saunoaga Faa-Taupou a le sui usufono mo Sagaga le Usoga.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.2) 2014/2015 & Tulafono Tau Faaofi o le Faatatauina o Tupe 2015/2016.*

**FOFOGA FETALAI:** Ua faamalo saunoa i lau Afioga i le sui usufono mo Sagaga le Usoga. E manatu lenei faamoemoe o lea ua e faafofoga mai ua pati taoto le Feepo i le tatou Maota e ala i lau saunoaga faataupou. O lenei foi ua faafofoga ma le manino lau tagi talatala pei o le tagi talatala a Metotagivale e pei o le faaoleole a le manaia i le tausala. Ia, ia e talitonu i lou valaauina, o le Atua e i ai tofiga ina ia faia le faiga filifiliga a le atunuu i le faiga palota o lo o loma nei a ua maea ona tofi le auvaa o le Paeaiga fou. Ia e faatuatua i le Atua ma e toaga i le itumalo. O le fautuaga lena a le tatou Maota, o ou mama na, ia maua lau tofa ma le faautautaga, faamoemoe i le Alii le savaliga ma le faamoemoega aua toe taimi o totoe. E tutusa lava aso e afe ma le aso e tasi, o le toe ta lava. E taua lou taunuu mai i lenei taimi mulimuli o le Paeaiga e tusa ai ma le galuega sa faatino e le sa avea ma sui usufono o le itumalo le Afioga ia Muagututagata. Faafetai o lea ua oo lava i ooooga o tuleiga ma saunoaga e momoli ai foi le faafetai i lea foi sui usufono sa tauaveina le Nofoa aemaise foi o le tapuaiga ma le filifiliga a le itumalo, ia pale i lou fatu ma sei i lou ao, aua e le faigofie le faaaloalo i le toe taimi ae le i filifilia maia oe e fai ma sui usufono.

Ia, ou te manatu o lea ua tatou latalata i le tatou taimi malolo, ona lagona lea, o lo o taoto le lafo a Lualemana i le faaauauina o tatou galuega i le afiafi a nanei mai le itula e 3:00 seia paia le itula e 7:00. E talosaga atu i sui usufono o lo o totoe, e le toe toatele, tali le Komiti, tali le Taitaifono, ia, ona tali loa lea o le tatou Malo. E manatu, e tatau lava ona uma tatou taeao pe a fua i le tulaga e tatau ona i ai. O lo o i ai foi nisi o fuafuaga taua, e le tuua foi nisi itu lelei ma nisi mea taua ae sili atu ona lelei ona o le faatinoga o nisi o fuafuaga a le Faigamalo ma le Malo ma le Palemene ma le Kapeneta ma le tatou mafutaga nei. O lea e tatalo atu ai, ia lavapapale mai pea le tatou Maota i le afiafi a nanei tatou faia se malologa mo nai nei itula pei ona alo atu foi le Afioga i le Palemia ma le Kapeneta i nisi o fonotaga taua ae tatou toe potopoto i le ta o le 3:00 i le afiafi a nanei.

E momoli atu le faafetai tele i le paia ma le mamalu o le Maota i lenei vaega o lea aso, malo le onosai. Ou te faasilasila atu o le a faataatiaese Taualumaga a le Fono Aoao seia aulia le itula e 3:00 i le afiafi a nanei.

*Na faataatiaese Taualumaga a le Fono Aoao i le itula e 12:55 i le aoauli seia aulia le itula e 3:00 i le aoauli.*